


LAKAW, ISULTI

 . . . magpamatuod, ug ang gamay'ng igsoong babaye nga anaa dinha sa luyo, sa tan-aw ko ginapahayag gyud niini kanang kantaha:

Oh, gugma sa Dios, pagkamadagayaon ug pagkaputli gayud!
Dili matukib ug pagkalig-on!

Pagkaanindot nga adlaw kini para kanato! Magmasinsero lamang kita, samtang ginaduko ang atong mga ulo karon, awiton nato kana sa Ginoong sa dili pa mag-ampo. Sige, Teddy, kung mahimo mo, hatagi kami og tinong chord. Ug awiton lamang nato kini sa . . . samtang ginaduko ang atong mga ulo, ginapiyong ang atong mga mata, sa dili pa mag-ampo.

Oh, love of God, how rich and pure!
How measureless and strong!
It shall for evermore . . . [Blangko nga bahin sa teyp—Ed.]

² Kung ang tinta, kung ang tanang tubig mao'y mamahimong tinta, ug tanang kalangitan pud himoong papel, ug ang matag lindog sa yuta himoong pangsulat, ug ang matag tawo tahasan nga magsulat lamang ang atimanon, bisan pa man niana dili niini igong maipahayag ang gugma sa Dios ngadto sa nahulog nga kaliwat ni Adan. Nagapasalamat kami Kanimo, Amahan, tungod sa nianang bililhong Dugo ni Ginoong Jesus, ug tungod sa nianang di-mahikalimtan nga buntag sa pagkabanhaw, ug tungod sa Imong gugmang nagatubos nga gibubo sa among mga kasingkasing karon, pinaagi sa Balaang Espiritu. Dad-a kami ngadto sa usa ka pagpakig-fellowship uban Kaniya, sa Maong Balaan, ang Magbubuhat. Dad-a kami ngadto sa panag-igsoonay, sa yuta, nga wala pa sukad malabwan. Wala ni kapunongan, ni panaad, wala gyu'y sukad, ang mahimong ikatandi sa panag-igsoonay nga iya sa mga natawo na pag-usab nga mga kalalaken-an ug kababayen-an. Ug nga hangtud sa kahangturan mamahimong alawiton sa mga balaan ug mga anghel!

³ Nagaampo kami karon nga Imong panalanginan ang tanang ginahimo namo sa pagpaningkamot nga ipahayag, ang among—ang among pagpasalamat sulod sa among mga kasingkasing nganha Kanimo, tungod sa Imong mga gibuhay alang kanamo. Ug ang mahibaloan nga dili lamang ang kasingkasing sa mga tinun-an ang napalipay niadtong buntaga, sila ni Maria ug ni Maria Magdalena, kondili lakip usab kami, nga Imong mga tinun-an karon, napalipay ang among mga kasingkasing niadtong oras nga nahibaloan namo nga Siya dili patay, kondili

buhi gayud. Magpabilin unta Siya nga buhi sulod sa among mga kasingkasing, sa among taliwala. Ginapangamuyo namo kini sa Ngalan ni Jesus. Amen.

Wala gayu'y bisan usa ang bug-os makapahayag sa pagkabanhaw!

⁴ Karon, sa niining buntag sa pagkabanhaw, usa kini ka maanindot kaayo nga panahon para mahitabo ang gamay'ng panghitabo sa simbahan karon, kana, ang idedekar sa mga inahan ang ilang mga bata. Usa kini ka bag-ong binuhat, nga naidugang sa ilang panimalay. Usa ka bag-ong panalangin ang miabot kanila. Ug gusto nila, agi'g balos, ihalad kini balik ngadto sa Dios.

⁵ Ug dayon pagkahuman niining—niining pangbuntag nga mensahe, magkaaduna kita og pagpang-ampo para sa mga may sakit, aron mangabanhaw kamo gikan sa inyong mga sakit, padulong ngadto sa bag-ong kahimsog-sa-panglawas. Sa gilayon pagkahuman niana, para sa kadtong mga wala pa mabautismohan, magkaaduna kita og pagkabanhaw bahin niana; nga igalubong sa tubig, aron mobangon nga may kabag-ohan sa kinabuhi. Ang tanantanan niining buntaga pagkabanhaw, pagkabanhaw gayud! Napahalipay mismo ang atong mga kasingkasing ug gihupay, samtang nga giawit nato ang mga alawiton ug naminaw sa mga testimonyo sa uban, bahin niining makahibulongang buntag sa pagkabanhaw. Ug sa paglantaw nato sa gawas ug makita nato nga malipayon usab ang Dios bahin niini, nangabuhi pag-usab ang mga kahoy.

⁶ Usa ka higayon kaniadto, didto sa Kentucky, nangayam kami ni Mr. Wood og squirrel, ug miadto kami didto sa lugar sa usa ka lalaki. Basin ania nagalingkod mismo karon ang maong lalaki, pero wala lang ko kabalo. Ug siya kono usa ka wala-nagatoo-sa-Dios. Ug nangutana si Igsoong Wood sa iya, miingon, “Puede ba ko mangayam og squirrel sa imong lugar?”

Ingon niya, “Oo, Wood, puede kang mangayam og squirrel. Sulod agi sa luyo.”

Miingon siya, “Bueno, giuban nako ang akong pastor.”

⁷ Ug ingon niya, “Wood, ayaw ko'g ingna nga nagpakaburong ka og ayo nga kinahanglan mo pa nga mag-uban og usa ka magwawali kanunay!”

⁸ Ug mao nga gitawag niya ako aron—aron ipailaila ako. Ug nasulti niadtong lalaki nga medyo malisod siyang patoohon nga lalaki. Nakawali na ang uban sa iya, niana, apan wala siya'y makita nga unsa man para mapatoo siya.

⁹ Ug aduna didto og usa ka punoan sa mansanas kon diin mipunit ako og usa ka mansanas. Bulan kadto sa Agosto. Ug giingnan nako ang tawo, ingon ko, “Pila na ba ka tuig kana nga kahoy?”

¹⁰ Ug ingon niya, “Mga traynta na ka tuig,” mga ingon niana o sobra pa. Siya kono ang nagtanum niadto.

¹¹ Ug ingon ko, “Napahimuslan mo na ba ang maong mansanas sukad niadtong namunga kini?”

“Siyempre, sir.”

¹² Ingon ko, “Unsa ma’y nahitabo nianang punoan? Kung tanawon mo kini, Agosto na karon, mainit ang panahon; pero nangahulog na karon ang mga dahon gikan sa punoan, ug mingbiya na ang duga sa mga sanga niini, nga mingkanaug na ngadto sa mga gamut. Kung magpabilin man gud ang duga dinha sa ibabaw sa tibuok tingtugnaw, mamatay gyud ang punoan; pero mikanaug kini ngadto sa yuta, aron itago ang iyang kaugalingon gikan sa mabugnaw nga hangin. Kay kung magpabilin ang duga dinha sa ibabaw, mamatay ang punoan, dili na gyud kini makapamunga pa og mga mansanas. Pero mokanaug man ang duga aron itago ang kaugalingon niini didto sa mga gamut, para mosaka balik sa ibabaw pagkasunod nga tuig, para dad-an kamo og mga mansanas gikan sa kung asa, ug pipila ka mga dahon.”

¹³ Ug ingon ko, “Karon, sir, ako—masulti mo unta kanako kung unsang Intelihensiya ang nagdasig niadtong duga nga mobiya sa punoan sa dili pa moabot ang mabugnaw nga panahon, ug mokanaug ngadto sa mga gamut para magtago? Kung masulti mo sa ako kung unsa ang nagpabuhat niana, ug ipasabut kini sa ako, kung unsa ang nagpabuhat niini, nan tugotan ta ka nga mahikap mo ang Dios.” Ingon ko, “Magbutang ka og tubig sa usa ka poste ug tan-awa kung mahimo ba kini, tan-awa kung mahimo ba kini pinaagi sa pagbag-o sa panahon. Aduna gyu’y usa ka gamhanang Intelihensiya nga nagpalihok niadtong duga nga monaug ngadto sa gamut sa punoan, ug dayon ipabalik kini pag-usab nga aduna na’y bag-ong kinabuhi. Ang Dios kana.”

¹⁴ Ug ingon niya, “Wala pa gyud ko sukad nakasimba.” Ingon niya, “Pero aduna’y usa ka magwawali nga nakaanhi sa Acton, usa ka higayon kaniadto, ug gisulti sa usa ka babaye, nga nagpuyo didto ibabaw sa bungtod, nga ang iyang igsoong babaye nakatambong kaniadto sa tigum niadtong gabhiona, ug nagsulti sa iya nga siya nag-ampo para sa usa ka igsoong babaye nga may kanser.” Ug ingon pa, “Ang asawa ko gani ug ako nagasige adto didto aron sa pagtabang kaniya.” Ug miingon, “Grabe na ang iyang kahimtang, tungod sa kanser sa tiyan, nga kinahanglan pa nila nga ipatakilid siya sa higdaanan gamit ang habol, ug uban pa. Gidala sa igsoon niyang babaye kadtong panyo sa pagpauli niini,” miingon, “human nga gisulti sa iya niadtong lalaki ang mahitungod sa kahimtang sa iyang igsoon ug tanan na, ang ingon, ‘ipandong mo ang panyo kaniya.’” Ug ingon pa, “Mamaayo na siya karon.”

15 “Ug ginapakita lang niini,” ingon ko, “ang mao rang Intelihensiya nga nagsulti niadtong duga sa punoan, matag tuig, sa atubangan sa mga mata mo mismo, nga mokanaug ngadto sa mga gamut ug magtago, maoy mao ra nga Intelihensiya ang nagsulti sa ako nga mamaayo kadtong babaye kung ipandong niya ang . . .” Ingon ko, “Dili kana kaayo—kaayo misteryoso. Mas maayong magwawali ang anaa sa atubangan sa nataran mo mismo, ang maong punoan, nga nagawali sa imo tuig-tuig.”

16 Kung motan-aw lang kita sa palibot, makita nato ang Dios sa tanang dapit. Siya anaa sa matag punoan, sa matag dahon sa sagbot. Wala’y makahimo niana kondili ang Dios lamang. Makahimo man kita og usa ka butang nga kaanggid niini; pero dili ang mismong kinabuhi, kay ang Dios kini.

17 Karon, usa ka gamay’ng dahon sa sagbot ang nadugang sa pipila ka mga panimalay dinhi, ug gusto natong idedekar kining gagmay’ng mga bata ngadto sa Ginoo. Teddy, aduna kita og mubong awit dinhi nga atong ginakanta, *Bring Them In*, mahimo mo ba nga tugtugon kana samtang ang mga inahan nga gustong idedekar ang ilang mga anak, ug mga amahan, ginadala nila ang ilang gagmay’ng mga anak dinhi sa altar.

18 Ug daghan kaayo kita og gagmay’ng mga bulak sa Pasko sa Pagkabanhaw dinhi sa altar niining buntaga, dili ba? Grabe, grabe! Nahunahuna ko nga ania kining gamay’ng mga Mary, mga Ruth, mga Rebekah, ang gamay’ng mga James, Paul, ug John, nga ania karon, gagmay’ng mga bulak sa Pasko sa Pagkabanhaw para sa sunod nga henerasyon.

19 Okey, sige dinha na lang. Siguro gustong kuhaan og retrato ni Igsoong Beeler kining—kining gamay’ng bata nga nagtindog dinhi, kini’y—kini ang apo ni Igsoong Wood, ug ni Igsoong babayeng Wood nga ania dinhi. Ug paanhi pa ang uban karon dala ang ilang gagmay’ng anak. Duol lang kamo, mga igsoon. Okey lang kana. Igsoong Neville.

20 Mahinungdanon ang panaghiusa sa balaang kaminyoon, giordena kini sa Dios. Ug tungod sa balaang kaminyoon nagbunga kini og hiligugmaon nga gagmay’ng mga bata.

21 Kinahanglan mong isulti sa ako ang iyahang ngalan dinhi karon. Brenda Sue. Daku na ang kausaban, langga, kay sa niadtong una ta ka nakita. Bueno, ania ang gamay’ng si Brenda Sue Wood, tinuod siya nga usa ka bililhong gamay’ng bahandi sa mga kasingkasing namong tanan, ug ilabina sa niining batan-on pa nga inahan ug amahan.

22 Ug bisan sa mga panahon sa Biblia, daghan nang mga tawo nga nanaghimo’g pagwisikwisik ngadto sa niining gagmay’ng mga bata, pero gipaningkamotan natong sundon kung unsa gayud ang pamaagi sa Biblia kutob sa atong mahimo, og ngani wala gyud kita’y nakita sa kung asa man nga giwisikwisikan ang mga bata, nga anaa sa Biblia, kondili gidala hinoon sila

ngadto kang Ginoong Jesus ug Iyang gipanalanginan sila. Ug ato silang ginakugos, ingon nga Iyang mga alagad, ug ginabayaw sila ngadto Kaniya.

²³ Nagatoo ko nga kabalo kamo kung unsa ka mapagarbohon ang apohan niini, kabalo na mo. Busa iduko na nato ang atong mga ulo sa makadiyut.

²⁴ Ginoong Jesus, ang Anak sa Dios, Nga gihatag para sa among kalapasan. Ug pagkabililhon niini nga makita ang gagmay'ng kabataan nga ginadala nganha Kanimo, sa paghandum sa nahitabo daghang mga tuig na ang milabay, sa dihang gidala sa mga inahan ug mga amahan kaniadto ang ilang mga anak nganha Kanimo. Ginakugos namo diha sa Imong atubangan, karon, sa mga bukton sa pagtoo, ang gamay'ng si Brenda Sue Wood, nga gipadala ngadto sa pamilya sa among igsoong David ug sa iyang bililhong asawa. Amahang Dios, panalangini kini nga bata.

²⁵ Ginapahayag nila ang ilang pagtoo sa Imo, samtang ginahalad nila ang bunga sa ilang pagkahiusa. Ug nangamuyo kami nga Imo silang panalanginan. Ug padilaabon unta sa Balaang Espiritu ang ilang mga kasingkasing, nga magkinabuhing ingon nga diosnon, hinalad nga mga kinabuhi, aron kining bata mamatuto sa usa ka Cristohanong panimalay, mapadaku diha sa pagpahimangno sa Dios, ug mabuhi sa usa ka hataas, malipayong kinabuhi dinhi sa yuta, ug mag-alagad sa Imo sa tanang adlaw sa iyahang kinabuhi. Ug pagdidto na sa Himaya, kon diin magkatiguman na ang magkapamilya, hinaut ang gamay'ng si Brenda Sue ug ang iyang papa ug mama, ug ang tanan sa ilang mga kabanay, magtigum palibot sa trono sa Dios, nga mga tinubos tungod sa grasya ni Cristo, nga tungod niini among ginabayaw kining bata nganha Kaniya karon.

²⁶ Akong gamay'ng igsoong babaye, ginatugyan ko ikaw karon kang Ginoong Jesus Cristo, para sa usa ka kinabuhi sa pag-alagad Kaniya, sa Ngalan ni Jesus Cristo, ang Anak sa Dios. Amen.

²⁷ Panalanginan kamo sa Dios, Marilyn, David, dala ang daghang kalipay ug kalampusan. Hinaut nga magkinabuhi ang gamay'ng bata para sa Gingharian sa Dios.

²⁸ Karon, ania ang usa ka buutan nga batang lalaki, nga may dakung pahiyum diha sa iyang nawong. Ang ngalan niya? [Mitubag ang inahan. Blangko nga bahin sa teyp—Ed.]

Sharon Rose...[Nagaingon ang inahan, “Sharon Daulton.”—Ed.] Daulton. Daulton. Anak ba kini ni Igsoong Ed? Bueno, mga, baynte-dos anyos na ang milabay, gikuha sa Dios gikan sa mga kamot ko ang usa ka batang si Sharon Rose, nga atua na sa Langit, karon. Ug karon, ang idedekar ngadto Kaniya, mao si gamay'ng Sharon Rose Daulton. Kaila nato sila

ni Igsoong Ed ug Igsoong babayeng Daulton, isip atong bililhong mga higala. Pagkaanindot nga bata!

Langitnon namong Amahan, among ginadala Kanimo kining batang si Sharon Rose. Ingon nga paghandum sa halangdong Ginoong Jesus, Nga ania kaniadto sa yuta, ug gidala nila ngadto Kaniya ang gagmay'ng mga batang babaye nga sama niini, Nagaampo ako para niining bata, Ginoo. Hinaut nga magkinabuhi kini nga mamahimong lig-on ug himsog. Hinaut nga magkinabuhi siya alang sa kahimayaan sa Dios. Panalangini ang iyang amahan ug inahan. Hinaut nga mapadaku siya diha sa pagpahimangno sa Dios. Ginapahayag nila ang ilang pagtoo sa Imo samtang ginahalad nila ang ilang anak Kanimo. Karon ginatugyan namo sa Imo, ang gamay'ng si Sharon Rose Daulton, nga Imong panalanginan ang iyang kinabuhi, Ginoo. Ginahalad ko siya gikan sa mga bukton sa iyang inahan ug amahan, sa Imo, akong Ginoo ug Manluluwas, nga si Jesus Cristo, alang sa Iyang kahimayaan. Amen.

Ang Dios magapanalangin kanimo, igsoong babaye, ug sa imo, igsoon.

Oh, my! Usa ka gamay'ng, masakiton nga bata. Unsa ma'y sakit niya? [Nagaingon ang inahan, "Nagasige'g daku ang iyang ulo." Blangko nga bahin sa teyp—Ed.] . . . butang nga lahi gyud. Nagatoo ako Kaniya.

Ginoong, Dios, ginabayaw ko sa Imo ang gamay nga si Mason. Nagaampo ako, Ginoong Jesus, nga Imong dawaton kining bata nga gikugos ko dinhi sa akong mga bukton, sa pagdedekar kaniya nganha sa Imo. Ginahinginlan ko ang sakit nga anaa kaniya. Sa Ngalan ni Jesus Cristo, hinaut nga maibutang ang gamay'ng si Mason diha sa Imong mga bukton, Ginoo, ug hinaut nga biyaan na siya sa maong sakit. Hinaut nga magkinabuhi ang bata alang sa kadungganang ug kahimayaan sa Dios. Ginapadayag sa mga ginikanan ang ilang pagtoo samtang ginahalad nila siya. Hinaut nga Imong ayohon ang maong bata ug mamaayo na siya. Hinaut nga magkinabuhi siya sa kahimayaan sa Dios, para mangalagad sa Imo. Ginoong Dios, ginahalad nako sa Imo ang gamay'ng si Mason, sa Ngalan ni Jesus Cristo, alang sa iyang kinabuhi ug alang sa iyang pagkaayo. Amen.

[Blangko nga bahin sa teyp—Ed.] Toohee lamang sa tibuok mong kasingkasing.

Oh, usa ka gamay'ng batang babaye, usab? Bueno, maanindot kana. Ari ka, gamay'ng bata. Tumindog ka mismo dinhi. Ang ngalan mo si . . . ? [Nagaingon ang amahan, "Sumner."—Ed.] Sumner. Igsoong lalaki ug Igsoong babayeng Sumner. Nagtoo ko nga taga-Georgia kamo, dili ba? Sa hunahuna ko may nadumduman ko nga pag-ampo. Daghang mga tawo nianang lugara. Kini pud si . . . ["Latrelle."] Latrelle.

[“Dwight.”] Dwight. [“David.”] Ug si David. Nadungog n’yo ang ilang ngalan. Hinaut nga isulat sa Dios ang ilang mga ngalan sa Basahon sa Kinabuhi sa Cordero.

Langitnon namong Amahan, among ginadala kining gagmay nga mga pinangga nganha Kanimo niining buntaga, samtang akong ginapandongan sa akong kamot ang salapid sa ilang ulo, humok nga buhok sa niining mga batang lalaki. Oh Ginoo, panalangini sila. Gipahayag sa ilang mga ginikanan ang ilang gugma ug ang ilang pagtoo diha Kanimo pinaagi sa paghalad sa ilang mga anak. Ug ginadedekar namo sila nganha Kanimo, Ginoo, maingon nga gikuha sila gikan sa mga bukton sa ilang mga ginikanan, aron motindog dinhi sa altar niining buntaga, aron maihalad ang ilang mga kinabuhi ngadto sa Dios. Panalangini sila, Amahan. Nagapangamuyo kami nga itugot Mong magkinabuhi sila nga malipayon, sa tanang mga adlaw sa ilang kinabuhi, Kinabuhing Walay Katapusan sa umaabot nga kalibutan. Hinaut nga mapadaku sila diha sa pahimangno sa Dios, sa usa ka Cristohanong panimalay.

Karon, pinaagi sa sugo ni Jesus Cristo, nga gihatag ingon nga panig-ingnan para sa Iyang mga ministro, aron nga ilang sundon ang susama sa gibuhat Niya, Ginahalad ko sila sa Imo, sa Ngalan ni Jesus Cristo. Amen.

[Blangko nga bahin sa teyp—Ed.]

Didto sa masidlakon nga estado sa Georgia, gidala kini nga bata dinhi sa iyang mahigugmaong amahan ug sa iyang inahan, aron idedadak sa Imo sa niining buntag sa paghinumdum. Kini’y tropeyo sa Imong grasya sa ilang pamilya. Nangamuyo ko nga Imong panalanginan ang gamay’ng si Renee, ang iyang inahan ug amahan. Ug ilang gipahayag ang ilang pagtoo sa Imo, pinaagi sa pagdala sa bata, nga gitinguha ang Imong mga panalangin kaniya. Ug hinaut nga mabuhi siya ug mahimong usa ka lig-on, malipayong Cristohanon, sa tanang mga adlaw sa iyang kinabuhi; ug makaangkon sa Kinabuhing Walay Katapusan sa mga adlaw nga umaabot, sa kalibutan nga umaabot. Itugot kini, Amahan. Sa pag-arsa Mo kaniadto sa ingon ka malulot nga gagmay’ng mga binuhat, nga sama sa niining mga bata karong buntaga, sa Imo Mismong mga bukton, gipahayag sa maong mga pamilya ang ilang pagtoo sa Imo, pinaagi sa pagdala sa mga niini sa Imong mga alagad. Ug gipanalanginan namo ang gamay’ng si Renee ug ginahalad siya sa Imo; gikan sa mga bukton sa iyahang ginikanan, nganha Kanimo. Sa Ngalan ni Jesus Cristo, hinaut nga Imong panalanginan siya. Amen.

Panalanginan ka, igsoon. Ang Dios magapanalangin kanimo, Renee.

Awiton lamang nato ang usa ka diyutay’ng berso niana.

Bring them in, bring them in,
 Bring them in from the fields of sin;
 Bring them in, bring them in,
 Bring the little ones to Jesus.

²⁹ Oh, daw sa unsa ko unta ka gustong moapil sa linya ug makighisgot bahin sa matag usa kanila nga gagmay'ng mga bata, pero langayan man gud ako, sa unsa mang paagi, ug nanagtindog pa gyud ang mga tawo. Giingon sa ako ni Igsoong Wood karong buntaga, ingon niya nga nagasakit na kono ang iyang likod, gumikan sa pagtindoga. Wala lang mo kabalo kung giunsa kong pagpasalamat ang inyong pagtindoga ug paghulat! Ug mao nga dalion nako ang mensahe, kutob sa mahimo. Ug paminaw gayud kamo og ayo.

³⁰ Wala na ako og oras kaganina para iandam ang mensahe para karong butanga, o kining mensahe niining buntag, bisan sa makadiyut. Mingkuha na lang ako og usa ka teksto ug usa ka butang nga lahi ra.

³¹ Ug sa miaging Pasko sa Pagkabanhaw nagwali ako sa hilisgotang: "Sa *buhi* pa, gihigugma Niya ako. Sa *pagkamatay*, giluwes Niya ako. *Paglubong*, gidala Niya pahalayo ang akong mga kasal-anan. *Pagkabanhaw*, Iya akong gimatarung nga walay-bayad hangtud sa kahangturan. *Moabot* Siya sa umaabot nga adlaw, oh, mahimayaong adlaw!"

Ug dayon kaganina lang buntag nagwali kita sa hilisgotang: *Kabalo Ko*.

³² Ug karon, kung itugot sa Ginoo, gusto kong mobasa gikan sa kapitulo sa San Marcos. Ug ubanan ninyo ako nga mag-ampo dayon.

³³ Ug pagkahuman niini dayon mao ang panerbisyo sa pagpang-ayo. Ug pagkahuman sa panerbisyo sa pagpang-ayo mao ang panerbisyo sa pagpangbautismo. Ug dayon ang mga panerbisyo unyang gabii sa alas siete-traynta na.

³⁴ Karon sa Marcos 16:

Ug sa miagi na ang adlaw nga igpapahulay, si Maria Magdalena, . . . si Maria nga inahan ni Jesus, ug si Salome, mao'y nagdala sa mga pahumot, aron sa pag-adto ilang ikadihog kaniya.

. . . sa kaadlawon pa gayud sa nahaunang adlaw sa semana, miabot sila sa lubnganan sa nakasubang ang adlaw.

Ug nasig-ingon sila sa usa'g usa, Kinsa may atong papaligiron sa bato gikan sa pultahan sa lubnganan?

Ug sa paghangad pa nila, ilang nakita nga ang bato naligid na: kay kini daku man kaayo.

Ug sa paghisulod nila sa lubnganan, ilang nakita ang usa ka batan-ong lalaki nga naglingkod dapit sa too, nga nagsul-ob sa bisti nga maputi og hataas; ug sila nakulbaan.

Ug sila nag-ingon kanila . . . Ug siya nag-ingon kanila, Ayaw kamo pagkahadlok: Kamo nangita kang Jesus nga Nazaretnon, nga gilansang sa krus: nabanhaw siya; wala na siya dinhi: tan-awa ninyo ang dapit nga ilang gibutangan kaniya.

Apan panlakaw kamo, ug sultuhi ninyo ang iyang mga tinun-an ug si Pedro nga siya moadto nga magauga kaninyo sa Galilea: didto inyong hikit-an siya, sumala sa iyang giingon kaninyo.

Ag nanggula sila sa gilayon, ug nangalagiw gikan sa lubnganan; kay nangurog sila ug giabot og kahibulong: wala sila magsugilon sa bisan unsa kang bisan kinsang tawo; kay nangalisang man sila.

Karon sa nabanhaw na si Jesus sa kaadlawon pa sa nahaunang adlaw sa semana, siya mitungha pag-una ngadto kang Maria Magdalena, ang gipagulaan niya og pito ka mga yawa.

Ug siya miadto ug nagpahibalo kanila nga nakauban kang Jesus, samtang siya . . . sa dihang sila nanagsubo ug nanaghilak.

35 Nakita n'yo, atua sila kaniadto sa tapok sa abo, usab.

Ug sila, sa ilang pagkadungog nga siya buhi, ug hingkit-an ni Maria, ug wala sila managpanoo.

36 Pagkamistryoso gayud sa mga Pulong sa Dios!

Ug sa tapus niining mga butang nga mitungha siya ngadto . . . sa laing dagway sa duha kanila, samtang naglakaw sila, paingon sa kaumahan.

Ug sa dihang . . . ug nanlakaw sila ug nagpahibalo niini sa uban: bisan pa niini wala sila managpanoo kanila.

Ug unya mitungha siya ngadto sa napulog-usa samtang nanaglingkod sila sa kan-anan, ug gisaway sila tungod sa ka- . . . tungod—tungod sa pagkawala nila'y pagtoo ug sa kagahi sa kasingkasing, kay wala man ugod sila mitoo sa mga nakakita kaniya sa tapus siya mabanhaw.

Ug siya miingon kanila, Panlakaw kamo sa tibuok kalibutan, . . . iwali ninyo ang maayong balita sa tanang binuhat.

Ang nagatoo ug nabautismohan maluwas; . . . ang dili nagatoo pagahukman sa silot.

*Ug kining mga ilhanan magauban kanila nga motoo;
Sa akong ngalan ilang himoong pagulaon ang mga
yawa; magasulti sila'g mga bag-ong sinultihan;*

*Makakupot sila'g mga bitin; . . . kung makainom sila'g
bisan unsa nga makahilong butang, dili kini makadaut
kanila; pagapandongan nila sa ilang mga kamot ang
mga masakiton, . . . sila mangaayo.*

*Ug unya ang Ginoo sa tapus siya mosulti kanila,
gibayaw ngadto sa langit, ug milingkod sa too sa Dios.*

*Ug sila nanagpanlakaw, ug nanagwali sa tanang
mga dapit, ang Ginoo nagabuhat uban kanila, ug
nagpamatuod sa pulong pinaagi sa mga ilhanan nga
gipauban niini. Amen.*

³⁷ Gusto kong hisgotan ang usa ka teksto gikan sa duha ka pulong: *Lakaw, Isulti.*

³⁸ Kabalo mo, wala kaayo'y kaayohan nga mahatag kung maglakaw ka nga wala ka'y usa ka butang nga igasulti. Sa hunahuna ko kana'y dugay nang dakung problema sa niining panahon. Manlakaw kita para magsulti, kay kung manlakaw kita pero wala kita'y isulti, wala'y unsa mang kaayohan nga makuha, wala'y unsa mang mahatag nga tabang sa mga tawo.

³⁹ Pero kung sundon lang nato ang mga tugon nga sama sa mga tinun-an nga nagdawat kaniadto sa maong sugo, nga mao ra gihapon nga sugo sa ato, "Lakaw, isulti sa Akong mga tinun-an nga Ako nabanhaw gikan sa mga patay." Lakaw, isulti kini!

⁴⁰ Dayon ang giingon Niya, "Lakaw, iwali kini, ug ipakita ninyo kining mga ilhanan nga Ako buhi gikan sa mga patay." Pagkaanindot nga mensahe! "Lakaw, isulti, ug sultihi, ipakita ninyo sa Akong mga tinun-an kining mga butang nga nakita ninyo, nga dili Ako patay, kondili nabanhaw gikan sa mga patay."

⁴¹ Sa pangbuntag nga Mensahe kaganinang buntag, hingbaloan nato nga ang matag usa sa ato adunay gamay'ng tapok sa abo nga mga problema ug mga pagsulay nga gilingkoran mismo nato, gani usahay, nagpaabot para sa kahupayan. Nahibaloan nato ang halangdong patriarca nga si Job nagkaaduna og usa ka panan-awon, tungod kay wala pa sila'y Pasko sa Pagkabanhaw kaniadto, pero nakita na niya sa unahan upat ka libo ka tuig kining buntaga. Nakita na niya sa unahan upat ka libo ka tuig, ang Pasko sa Pagkabanhaw, ug misinggit, diha sa iyang kagul-anan, "Nasayod ako nga ang akong Manluluwas buhi! Sa kaulahiing mga adlaw, Siya motindog ibabaw sa yuta. Bisan pa sa tapos ang akong panit kining lawas malaglag, unya diha sa akong unod makita ko ang Dios."

⁴² Karon, human sa Pasko sa Pagkabanhaw, nakita nato nga gihatagan sa Dios ang tawo og usa ka sugo, “Lakaw, isulti! Ug kung isulti ninyo, magasunod gyud *kini* sa inyo. Lakaw ug isulti!”

⁴³ Bueno, wala’y maayo nga mahatag niini, sama nga giingon ko na, ang molakaw, nga mosangyaw, gawas lamang kung aduna ka’y butang nga isulti. Ug kung sayup pud ang imong mensahe nga isulti, kung ingon niana dili maayo ang mahatag niini. Kinahanglan nga isulti mo gyud kung unsa ang sekreto.

⁴⁴ Usa ka higayon kaniadto ginabasa ko ang usa ka libro, mahitungod sa usa ka gamay’ng batang lalaki nga . . . niapil sa usa ka pagpakig-indigay. Ug sa niining pagpakig-indigay mamahimo siyang bantugan. Kinahanglan nga ang kinsa man nga batang lalaki nga masag-ulo ang password hangtud nga siya makaabot sa usa ka lugar, ug masulti niya ang maong password, ug pasudlon siya sa gilayon sa bantay sa pultahan. Gibuhat kadto para masusi gyud ang IQ sa bata. Ug pagmoabot na siya sa maong lugar, nga masulti niya ang mga password nga gihatag sa iya, maabli dayon ang pultahan ug makadaog siya sa dakung kadunganan.

⁴⁵ May usa ka batang lalaki, tungod sa ka paspas niyang modagan, ug nahibalo gyud nga mahimo niyang lagpasan ang tanan sa uban pang mga batang lalaki nga moapil sa lumba, o nagdahum siya nga mahimo niya. Nagbansay gyud siya adlaw-adlaw, sa pagdagan. Kung giunsa nga gianad niya ang kargada sa gamay niyang baga, nagpakunhod pa gyud sa iyahang timbang, aron dili siya daling kapuyon samtang nagadagan. Ug nagbansay siya kung unsaon pagsugod sa iyang mga tiil, ug aron maunahan ang uban pang mga batang lalaki. Ug unsaon niya sa pagginhawa sa oras sa iyang pagdagan, para kontrolado niya ang hangin nga mosulod sa iyang lawas, para mamintinar niya ang epektibong hangin, para dili niini kaayo paluyahon ang iyang kasingkasing. Gitun-an gyud niya kadto gikan sa matag anggulo nga mahimo niya.

⁴⁶ Ug sa buntag nga nagsugod na ang lumba, adunay kapin sa usa ka gatos ug singkwenta ka gagmay’ng mga batang lalaki nga naglinya didto, ug pare-parehong edad. Kining gamay’ng batang lalaki diay medyo may hustong gidak-on, sa kapareho niyang edad. Ug gitiman-an gyud niya ang tanan nga iyang nabansay. Ug nangandam na siya. Atua na sila didto sa linya, nga nag-atubang na sila sa—sa pisi nga atua didto, giduol ang ilang gamay’ng ilong sa pisi niini. Gitun-an gyud niya ang tanang patakaran niadto, giandam na ang iyang kaugalingon.

⁴⁷ Ug dayon sa pagbuto na sa pusil, ug gibugto na ang pisi, milukso paabante ang maong mga batang lalaki. Ug lagsik ang panglawas niining gamay’ng batang lalaki hangtud nga milukso siya nga mas una kay sa uban kanila. Ug gidagan

niya ang lumbaanan nga grabe ka kusog kaayo, binansay gyud, hangtud nga naunahan niya sa pagdagan ang matag batang lalaki nga atua niadtong lumba. Ug atua na siya didto, oh, medyo dugay-dugay na, siguro usa ka minuto o sobra pa, sa dili pa makaabot ang pinakapaspas nga uban pang mga mandaganay sa maong lugar.

⁴⁸ Pero, bisan sa tanan niyang pisikal nga pagbansay, nalimtan niya kadtong password. Nalimtan gyud niya kadto mismong butang nga isulti niya, para pasudlon siya sa pultahan. Ug paadto-nganhi siyang naglakaw, ug gidumdum kung unsa kadto, ug gihinuktokan niya og ayo. Mas gitutokan niya ang natural, pisikal nga mga kahimtang sa iyang lawas, hangtud nga nalimtan na hinoon niya ang pinakamahinundanong butang. Ang sunod-sunod, nga mga nangabot, nga mga batang lalaki nga di kaayo kusog modagan, natiman-an ang password, ug nakasulod.

⁴⁹ Ingon niana pud kini sa karon! Mas nakatutok kita sa pagpangtukod og dagkung mga balaang dapit, ug mga simbahan ug mga bilding, ug uban pa, ug mas nakatutok sa pagmintinar sa katahum sa atong mga simbahan, nga maanindot nga mga bilding ug komportableng mga bangko ug nindot nga mga organ. Ginabandilyo nga ang atong mga ministro binansay gyud gikan sa... Nga aduna gyud sila'y Doktor DL., Ph.D., LL.D. nga mga digri, pero nalimtan nato kung para sa unsa ang ginadagan nato. Mao kana ang problema. "Lakaw, isulti sa Akong mga tinun-an nga Ako nabanhaw gikan sa mga patay ug makigkita Ako sa ila didto sa Galilea." Nalimtan nato ang pinakamahinungdanong pulong. Nahimong okupado na hinoon kita sa ubang mga butang, sa pagpangtukod og dagkung mga simbahan, sa pagpangtukod og dagkung mga denominasyon, hangtud nalimtan na hinoon nato ang pinakamahinungdanong pulong.

⁵⁰ Daghang mga kinabuhi ang naluwas tungod sa pagpangandam para sa mga umaabot nga panghitabo. Usa ka higayon kaniadto, gisulti sa ako nga didto sa Florida, kadtong tigbalita, ang buhatan sa lakaw sa panahon, nagpasibya sa kahanginan nga aduna kono'y kusog nga bagyo nga moabot. Ug may usa ka lalaki nga nagmanokan, ug giadtoan niya ang iyang silingan ug gibalitaan niya kini mahitungod sa umaabot nga bagyo. Wala kini panumbalinga sa silingan, ug miingon, "Binuang!" Ug nagpadayon lang siya. Wala gipangbakwit sa lalaki ang iyang mga manok sa taas nga lugar. Wala gayud siya mitago sa luwas nga kapuy-an. Wala gyud siya naghimo'g unsa mang mga pagpangandam. Ug ang nagbalita niya nga singan naghimo'g mga pagpangandam. Mao nga ang tanan, nga panag-iyas sa lalaki nga wala naminaw sa pasidaan, tanan sa mga manok niya naanud sa baha ug nangamatay, naguba ang iyang balay, dili na makita ang iyang mga mananap, nadala pa

gani siya sa ospital. Tungod lang sa hinungdan nga wala siya magtagad sa maong pasidaan! Kabalo siya mismo nga nahatag na ang mensahe, pero lang wala niya gisunod ang mensahe.

⁵¹ Ingon niana pud ang nagakahitabo sa panahon karon, sa kadaghanan sa atong mga kaigsoonan, sa kadaghanan sa atong mga kaiglesiahan. Kabalo kita nga nagatudlo ang Biblia nga si Jesus Cristo mao sa gihapon kagahapon, karon, ug hangtud sa kahangturan. Kabalo kita nga nagatudlo ang Biblia, ang ingon ni Jesus, sa San Juan 14:12, “Ang nagatoo Kanako, bisan pa, ang mga buhat nga Akong ginabuhar pagabuhaton usab niya; labaw pa niini nga mga buhat ang iyang pagabuhaton, tungod kay moadto na Ako sa Amahan.” Karon mas nakatutok hinoon kita sa ubang mga butang, nga wala gidawat ang pasidaan, wala gyud magtagad. Tinuod nagadagan kita, pero wala gyud magtagad sa Mensahe. Nakaabot kita didto, pero wala kita kabalo kung unsa’y isulti pag-abot nato.

⁵² Pipila pa lang ka adlaw ang milabay sa diha nga ang mga iglesia niining kalibutan, sa dihang napaulawan ang mga iglesiang Cristohanon ug giyatakan ang dungog niini, niadtong ang halangdon ug bantugan ug may-kahadlok sa Dios nga alagad, si Billy Graham, gipaaturang sa Biblia. Nagdagan siya, pero nakalimot hinoon sa Mensahe; sa dihang mingtindog kadtong Mohammedan sa iyang atubangan ug gisultihan siya, “Kung kini man ang Pulong sa Dios, sige ipakita mo ang pagka-realidad Niini.” Nagdagan siya’g maayo, nagpahigayon og dibasta-basta nga mga rebaybal, mga dagkung butang. Pero, sa dihang pag-abot na niya sa maong lugar, wala gyud diay siya’y Mensahe.

⁵³ “Ako nabanhaw gikan sa mga patay. Ako mao sa gihapon kagahapon, karon, ug hangtud sa kahangturan.” Nagadagan sa pisikal, nindot nga mga simbahan, daghang mga miyembro, dagkung mga denominasyon, pero dili kana ang sukarang-tunog. Tan-awa ninyo ang nagsunod, “Ug kining mga ilhanan magauban kanila nga nagatoo.” Lakaw, pero wala kabalo kung unsa’y isulti.

⁵⁴ Dili gyud magpadala ang Dios og usa ka tawo gawas nga hatagan Niya kini og usa ka butang nga isulti. Kanunay’ng ginapamatud-an sa Dios ang Iyang mga Pulong.

⁵⁵ Nagasangyaw, pero wala’y masulti pag-abot didto. Bisin pa kung unsa ka dagku ang inyong mga rebaybal, unsa pa ka dagku ang inyong simbahan, o unsa pa ka nagpatigbabaw ang inyong denominasyon sa uban, kung wala kamo’y ikasulti nga butang sa ila, ang anaa sa inyo walay lain kondili usa ra ka pundok sa mga tawong nagkatigum-tigum nga sama sa usa ra ka kapunungan?

⁵⁶ Aduna kita’y usa ka Mensaheng igasulti ngadto sa kalibutan, “Si Jesus buhi! Dili Siya patay!” Nga ginatuman ang Mensahe!

⁵⁷ Sa niining gamhanang nasud nga ato karon ginapasalamatan, ang Estados Unidos sa Amerika, bisan pa sa tanang kaguliyang niini, sa tanang kalaw-ayan niini, sa tanang dautang punto niini, pero kini mao gihapon ang pinakamaanindot nga nasud sa kalibutan, ug sa sinugdanan, husto man ang pagkatukod niini. Wala lang niini gidala ang Mensahe.

⁵⁸ Daghang mga tuig na ang milabay, kaniadtong anaa pa kining nasud sa kinasugdanan niini, nahinumdom ako sa usa ka istorya, nga ilugon na unta sa mga taga-Britanya ang komonwelt sa niining nasud. Ug adunay usa ka pundok sa mga kalalaken-an ang nagtipun-tipon ug atua pa sa ilang katungdanan, nga nagabantay. Ug aduna didto og usa ka kabayo nga nagpabilin nga nakahigot, ug usa ka mangangabayo usab nga andam mosakay niini bisan unsang minuto. Ang unang butang nga nabalitaan niya mao'y usa ka ilhanan nga papaabot na ang mga taga-Britanya, ug misakay siya sa iyang kabayo. Unsa man ang kapuslanan nga padaganon niya ang iyang kabayo? Unsa man ang mahatag nga kaayohan, nga bunalan niya ang kabayo ug dali-daling mangabayo gikan niadtong simbahan padulong sa Boston? Unsa man ang mahatag niadto nga kaayohan sa iya kung wala man pud siya'y mensaheng isulti sa mga tawo? Unsaon sa pagpanghibalo sa mga tawo nga kinahanglan na nilang mangandam sa ilang mga kaugalingon?

⁵⁹ Maayo modagan ang atong mga modernong Paul Revere, pero, nagadagan lang sila, nga wala gyu'y Mensahe. Ania na ang maong takna, kasamtangang nagakahitabo ang usa ka krisis! Anaa na sa pagkatapos ang kalibutan! Naabot na sa mga simbahan ang sangkoanan. Naabot na sa mga nasud ang ilang sangkoanan. Naabot na sa kinabuhi sa tawo ang sangkoanan niini. Naabot na sa siyensiya ang sangkoanan niini. Nag-organisar kita ug nanagbuhat og dagkung mga simbahan, binansay ang atong mga magwawali ug pisikal silang ginaandam, para mahibalo sila kung unsaon paggamit ang ilang mga berbo ug mga adberbyo, ug ang ilang mga paglitok ug—ug ang tanan sa ilang mga vowel, ug nga ang tanan haum kaayo sa sikolohiya, para makontak ang mga tawo. Pero dili kana ang gisulti ni Jesus!

⁶⁰ “Sa Akong Ngalan pagahinginlan nila ang mga yawa. Magasulti sila'g mga bag-ong sinultihan. Kung paakon man sila sa makamatay nga serpente, dili kini makapangdaut kanila. Kung pagapandongan nila sa ilang mga kamot ang mga masakiton, sila mangaayo.” Nanginahanglan ang kalibutan og usa ka mensaherong adunay dala nga Mensahe, para mosulti'g usa ka butang, ug kabalo kon diin naggikan ang Mensahe ug kung kang Kinsa Kini naggikan.

⁶¹ Si Paul Revere, sa pagsakay niya sa iyang kabayo, usa ka maisogon nga tawo, usa ka tawong anaa sa kasaysayan

basta aduna pa'y nasud nga adunay kasaysayan. Gihimo niya kadtong bantugang pagpangabayo gikan sa mga hagdanan sa simbahan, nga adunay dala nga mensaheng nagpa-alarma sa tanan, gikan sa labing kabus hangtud sa labing adunahan, gikan sa mag-uuma hangtud sa negosyante, "Moabotay na ang mga taga-Britanya!" Ug ang mga sundalo nga andam matag minuto nangandam dayon sa ilang mga kaugalingon para sa maong pag-atake. Ug naluwas kining bantugan nga nasud.

⁶² Kung kining panulondon sa Dios, kung kining mga tawo nga gipakamatyan sa Dios, kung kining Iglesia nga gitawag sa Iyang Ngalan, maluwas gyud, kinahanglan natong magkaaduna og mensaherong adunay dalang Mensahe nga gikan mismo sa Trono, aron atubangon ang hagit sa niining panahon. Anaa'y usa ka Goliath, pero ang Dios sigurado gyud nga adunay David sa kung asa man. Kinahanglan natong mahinagbo ang kontak. Kinahanglan natong nga magkaaduna og... Kinahanglan nga aduna kita'y Mensahe.

⁶³ Paadto man ta, pero wala man pu'y isulti. Gipamatud-an lang niini, nga niining panahona misangko na kita sa usa ka kahimtang nga ang nasud o ang katawhan ginapanghimakak na si Jesus Cristo ingon nga Anak sa Dios, ug ginaatubang na mismo ang pinaka bangiitan natong mga ministro sa niining panahon. Ug dayon diha sa atong dagkung kapunungan sa simbahan, makakaplag ka og kapin kon sobra sa traynta ka dokumentadong dugay nang mga Komunista sulod sa baynte o traynta ka tuig, nga miyembro diay sila sa partidong Komunista, sulod sa naghiusa natong mga simbahan. Unsa ma'y atong mahimo? Ginapakita lang niini nga nagdagan sila nga wala gyu'y Mensahe; nga ginabaligya ang mismong mga katungod sa pagkapanganay niining nasud, nga ginabaligya ang mga katungod sa pagkapanganay sa Iglesia.

⁶⁴ Ang tanan niini miabot na ngadto sa usa ka pagpakigsangka. Miabot na kini sa usa ka punto nga ang diyutay'ng Iglesia nga mitoo sa Mensahe, ug nanagbarug na, nga nakatutok ang ilang mga mata ngadto sa Krus, nga sa ilang kasingkasing ang pagkabanhaw ni Jesus Cristo, nga nanagdilaab! Miabot na kini sa usa ka punto kon diin kinahanglan nga ilhon Kini sa mga nasud. Nagaabot na kini ngadto sa usa ka pagpakigsangka. Dili ikatingala nga ang mga kaiglesiahanan... Sa dihang ang Konseho sa mga Kasimbahanan, puno na mismo sa pagka-Komunista, dili ikatingala nga dili na sila makatoo sa supernatural. Dili ikatingala nga dili na sila makatoo sa Langitnong pagpang-ayo; wala sila nagkaaduna og unsa mang Mensahe sulod sa ilang kasingkasing, bisan pa kung unsa ka kusog ang ilang pagdagan.

⁶⁵ Pagmosulod ang Espiritu Santo sa kasingkasing sa usa ka tawo, pagatoohan gyud niya nga nabanhaw si Jesus Cristo gikan sa mga patay, Ug buhi si Cristo sa sulod niya, aron mamuhat, ug

aron buhaton ang kabubut-on nga gianhi ni Cristo para buhaton; ang kabubut-on, ang kabubut-on sa Dios pinaagi sa kinabuhi nianang tawo.

⁶⁶ Pero, ang problema, nagadagan kita nga basta-basta lang, nagadagan kita nga wala’y Mensahe. Nagadagan hinoon kita nga dala ang teolohiya. Nagadagan kita nga dala ang usa ka matang sa interpretasyon nga iya sa simbahan mahitungod sa mga Kasulatan.

⁶⁷ Kinahanglan nato nga mosangyaw nga dala ang pagkabanhaw! “Lakaw, isulti sa Akong mga tinun-an nga mag-organisar Ako og usa ka bag-ong iglesia”? Dili, sir! “Lakaw, isulti sa Akong mga tinun-an nga Ako nabanhaw gikan sa mga patay, sumala sa Akong giingon na nga maingon niana Ako.” Kana ang Mensahe ngadto sa Iglesia niining buntaga, nga si Jesus wala mamatay. Siya buhi, ug ingon ka halangdon ug gamhanan sa gihapon karon sama sa kung unsa Siya kaniadto.

⁶⁸ Nagkaaduna na kita og daghang mga mensahe sa mga pagpasidaan, para makaandam, si Paul Revere ug ang uban pang mga maisogon nga mga tawo, ug daghan nang mga gubat ug mga bagyo, ug uban pang mga butang.

⁶⁹ Dayon, nagapadala ang Dios og usa ka Mensahe sa kahupayan, usab. Kini mao’y usa ka Mensahe sa kahupayan.

⁷⁰ Usa ka higayon kaniadto, sa dihang aduna pa sila’y pagpangulipon didto sa Habagatan, gidala sa mga Boer gikan sa South Africa ang mga lumad, nga ang tawag nato niini, sa karon, “ang itum nga tawo.” Ug gidala nila sila dinhi ug gipangbaligya sa mga Amerikano didto sa Habagatan, para himoon silang mga ulipon.

⁷¹ Adunay dakung pag-alsa mahitungod niini didto sa Africa sa karon, mga pagpamatay, ug uban pa, nga nagapadayon. Gipakiglimbasogan nila ang ilang kagawasan. Aduna man sila’y katungod nga pakiglimbasogan kini. Gibuhat sa Dios ang tawo; nagbuhat pud ang tawo og mga ulipon. Nga dili man unta ingon niana ang katuyoan.

⁷² Pila ka tuig na ang milabay, didto ako sa koliseyum, o usa ka dakung museo, diay. Naglakaw-lakaw ako didto, nga nagatan-aw niadtong nagkalainlaing mga hulagway ug uban pang mga butang, tungod kay mahilig ako og art. Sa hunahuna ko anaa usab ang Dios sa art. Ug sa pagduol ko didto, ug namatikdan nako nga adunay usa ka tigulang nga lalaking Negro, tigulang na gyud siya, bako na ang iyang mga abaga, may diyutay na lang nga pabiyo nga buhok sa likod sa iyang ulo. Nagkalo siya. Ug naglakaw-lakaw pud siya didto, ug mora’g sa *ingon-nianang* paagi, galantaw-lantaw sa palibot, nga mora’g may ginatan-aw siya o aduna siya’y ginapangita sulod sa museo. Mihunong ko ug giobserbahan siya sa makadiyut.

⁷³ Ug sa wala madugay miduol siya sa usa ka gamay'ng kahon didto. Ug gitan-aw niya ang sulod niadto, ug nakurat siya, ug ang misiga ang iyang mga mata. Miatras siya gikan sa kahon kadali, gitangtang ang iyang kalo, nga gilugpit kini sa iyang kamot. Ug giobserbahan ko lang siya. Ug samtang ginaduko sa maong tigulang nga itum ang iyang ulo, nagsugod sa pagtulo ang mga luha diha sa iyang mga aping. Ug nagatan-aw ako kaniya nga may pagkahibulong, nga medyo dugay-dugay.

⁷⁴ Dayon sa hunahuna ko, “Hibaloon ko kung bahin sa unsa ba ang nagpaukyab sa tigulang nga lalaki.” Miduol ako sa kilid nga bahin *niadtong* kahon, ug sa paglantaw ko dunay napahimutang nga usa ka bisti didto.

⁷⁵ Ug gitan-aw ko siya samtang nagtindog siya didto. Ug giduolan nako, ingon ko, “Kumusta ka, tiyo?”

Ug ingon niya, “Kumusta ka man, sir.”

⁷⁶ Ug ingon ko, “Usa ako ka ministro. Nakalitan lang ko sa pagkakita nimo nga naghalad ka og pag-ampo sa lugar nga sama niini.” Ingon ko, “Siguro usa ikaw ka Cristohanon.”

Ingon niya, “Oo, sir.”

Ug ingon ko, “Unsa ba gyud ang nagpaukyab sa imo og ayo?”

⁷⁷ Ingon niya, “Duol ka ngari.” Ug giubanan nako ang maong tigulang nga lalaki, paduol didto. Ingon niya, “Nakita mo ba kanang bisti?”

Ingon ko, “Oo, sir.”

Ingon niya, “Nakita mo ba kanang lama nga anaa dinha?”

Ingon ko, “Oo, sir.”

Ingon pa, “Tutang mo ang imong kamot sa akong kilid.”

Ingon ko, “Unsa man kanang sapnot?”

⁷⁸ Ingon niya, “Bakus sa pagkaulipon ang nagalikus niana, kaniadto. Ug *kanang* anaa dinha maoy dugo ni Abraham Lincoln.” Ingon niya, “Ang iyang dugo ang nagtangtang sa bakus sa pagkaulipon nako.” Ingon pa, “Dili ba kana makapaukyab sa imo, usab?”

⁷⁹ Nagtindog ako didto nga may pagkahipugwat. Sa hunahuna ko, “Kung ang dugo ni Abraham Lincoln makapaukyab—makapaukyab sa kalipay sa usa ka ulipon, tungod sa pagtangtang sa bakus sa pagkaulipon gikan kaniya, unsa pa kaha ang mahimo sa Dugo ni Jesus Cristo ngadto sa mga tawo nga sama ni Rosella dinhi, nga nahimong ulipon sa ilimnong makahubog; sa ako, nga naghimalasyon kaniadto, nga usa ka makalolooy og alaut?” Gitangtang Niya gikan sa akong kasingkasing ang bakus sa pagkaulipon sa sala. Dili ba angay rang magpaukyab kini sa kalipay sa usa ka tawo? Dili ba angay lang nga magpabati kini kaniya og lahi? Dili ba angay lang nga magpahimo kini kaniya nga magmatinahuron paghinuktokan

niya kini? Dili ka gani makatutok sa usa ka kahoy nga dili ka makaduko sa imong ulo, halos, ingon nga kabalo ka nga gitubos ni Jesus ang imong kinabuhi sa ibabaw nianang kahoy.

⁸⁰ Sa pagpadayon nato, sa makadiyut, mahitungod sa mga ulipon, ug sa atong hunahuna. Aduna kaniadto og usa ka proklamasyon, Proklamasyon bahin sa maong Kagawasan, nga gipirmahan, ug ang mga ulipon mamahimong gawasnon na sa usa ka pihong adlaw. Dili mo mahibalo, oh, kung wala pa ninyo sukad naila si Cristo, dili mo mahibalo kung unsa kamahinungdanon kadto para sa mga ulipon. Sa dihang gibandilyo kini, ug mensahe sa tibuok kayutaan, nga, “Mamahimo kamong gawasnon na sa ingon niini-ug-ingon niana nga adlaw, pagbanag-banag. Mamahimo na kamong gawasnon. Dili na ninyo kinahanglan pa nga magsul-ob og mga bakus sa pagkaulipon, dili na pud kamo makadawat og mga pagpanglatigo. Kondili mga gawasnon na kamo, ug usa na kamo ka lungsoranon sa niining bantugan nga Estados Unidos. Dili na kamo mga ulipon, pagkahuman sa pagbanag-banag sa ingon-aning buntag.” Oh, dinuyogan sa dakung mga kahinam nanaghulat mismo sila.

⁸¹ Kung makita lamang kana sa makasasala! Kung maminaw lang unta ang makasasala sa tinuod nga Ebanghelyo! Dili ang pagpamiyembro sa usa ka iglesia, kondili ang pagwali sa Ebanghelyo, nga makalingkawas kamo gikan sa sala, nga makalingkawas kamo gikan sa inyong mga sakit. “Sa ingon-niini og ingon-nianang oras,” kanang oras mismo nga mitoo kamo.

⁸² Kabalo mo, kadtong mga ulipon nangalipay kaayo ug atua sila sa dakung kahinam, nga nanagpaabot sa oras nga mamahimong gawasnon na sila, hangtud, giestorya nila sa ako, nga nanagtigum kono sila didto sa tiilan sa usa ka bungtod, mga inahan ug gagmay'ng mga bata, tanan sila nanagtigum, ug mga tigulang na ang uban kanila. Ug mingtungas sila didto sa pinakaibabaw sa bungtod, sa mga tungang-gabii. Tungod hingbaloan nila nga pag-abot sa pagbanag-banag ug pagsubang mismo sa adlaw, mamahimo na silang mga gawasnon na. Dili na gani molagpas sa katunga sa minuto ang pagsubang sa adlaw gikan sa pinakaibabaw sa bungtod, pero ang uban sa ila atua na mismo didto sa pinakaibabaw sa bungtod, nagbantay, nga nagbantay. “Oh, pagsubang mismo sa adlaw, gawasnon na kita.” Kana ang a-n-a-k . . . o, a-d-l-a-w.

⁸³ Pero pagmosubang na ang A-n-a-k usa sa niining mga adlaw! Ug sa dihang mibangon ang A-n-a-k niadtong mga napulo'g siyam ka gatus ka tuig ang milabay, gibugto Niya ang tanang bakus sa pagkaulipon, gibuhian Niya ang tanang mga binihag, Giayo Niya ang tanang sakit, gihatagan Niya og kagawasan kadtong mga anaa sa pagkaulipon. Ingon niana mismo ka kinahanglan natong motungas ug magbantay!

⁸⁴ Ug sa dihang hinay-hinay na nga misubang ang adlaw, ang pinakauna, ang tawo nga atua sa pinakataas, nakita niya kadto, ug misinggit siya ngadto sa sunod nga tawo, “Gawasnon na kita!” Ug misinggit pud kadtong sunod nga tawo ngadto sa tawong atua sa ubos sa bungtod, “Gawasnon na kita!” Hangtud miabot kini ngadto sa kampo, “Gawasnon na kita!” Kay, misubang na ang adlaw, nga ilang ginahulat, nga ginahulat, nga ginahulat hangtud niadtong orasa.

⁸⁵ Unsa pa ka mas angay lang kanato nga managtukaw, karon, para sa A-n-a-k sa Dios. Gawasnon na kita gikan sa sala. Gawasnon na kita gikan sa mga talikala. Gawasnon na kita gikan sa mga bisyo. Gawasnon na kita gikan sa pagpanigarilyo, pag-inom-inom, paghubog-hubog, tungod kay nabanhaw na gikan sa lubnganan ang A-n-a-k sa Dios ug gibugto na ang matag talikala. Ang tanan nga pagkahinukman wala na! Gibayran na ang utang. Gibayran na ang silot. Gihugasan na ang mga kasal-anan, ug gawasnon na kita. Oh, gawasnon na kita, mga igsoon! Sa pagkaulipon? Kagawasan, sa dihang ang Anak sa Dios nabanhaw nga adunay dalang pagpang-ayo diha sa Iyang pako!

⁸⁶ Sa umalabot nga adlaw motindog Siya gikan sa Trono, mobalik sa yuta. Ug ayha na kita mahimong gawasnon gikan sa tanang mga kasakit ug tanang mga tentasyon, mahimo nang gawasnon gikan sa tanang tawhanong kangutngot ug sa kung unsa pa nga dala niining tawhanong kinabuhi, para mabuhi nga kauban Niya hangtud sa kahangturan. Mamahimong gawasnon na kita. “Lakaw, isulti,” kana ang angay natong buhaton.

⁸⁷ Sa panahon kaniadto sa Biblia, adunay tuig sa jubileo nga nagaabot. Ang mga tawong gipangbaligya tungod sa mga utang nga giutang nila, aduna sila’y utang ug wala sila’y kasarang nga bayaran kini, busa nangadto sila ug aron ibayad ang ilang mga kaugalingon ngadto sa mga tawo, isip nga mga ulipon. Ug kinahanglan nilang magpabiling ulipon sa niining mga tawo, mahimong ulipon nila, sa tibuok nilang kinabuhi. Pero, adunay panahon nga nagaabot, nga usa ka adlaw sa grasya, nga giila ingon nga tuig sa jubileo. Ug sa dihang moabot na ang tuig sa jubileo, adunay mogawas nga usa ka sacerdote ug patunggon niya ang trumpeta. Ug nagapasabot kadtong lanog sa trumpeta ngadto sa matag ulipon, nga bisan unsa pa ka dugay siyang nagserbisyo ug bisan unsa pa ka dugay ang kinahanglan niyang magsebisyo, sa dihang patunggon na kadtong trumpeta, ang maong ulipon gihimo nang gawasnon. Mahimo na niyang ibutang ang guna ug makapauli na ngadto sa iyang mga anak. Dili na siya kinahanglan pa nga magtrabaho, tungod kay gawasnon na siya sa dihang motingog na ang jubileo. Ang maong trumpeta wala naghatag og dili-matino nga tingog, kondili naghatag kini og tino nga tingog mismo. Ug mahimo na

nga ibutang sa ulipon ang iyang mga pangtrabahong gamit, og makapauli na siya nga gawasnon gikan sa pagkaulipon.

⁸⁸ Kaganinang buntag, ang giingon sa Biblia, “Ug kung ang trumpeta nagahatag og tingog nga dili-matino, kinsa ma’y makahibalo kung unsa’y buhaton?” Kung ginawali sa Biblia nga nabanhaw si Jesus Cristo gikan sa mga patay, nga Siya ang mao sa gihapon kagahapon, karon, ug hangtud sa kahangturan, ug ang gipatingog nga mga trumpeta nga madungog nato karon nagaingon, “Milabay na ang mga adlaw sa milagro, wala na’y ingon nianang butang sama sa Balaanong pagpang-ayo,” kinsa’y makahibalo kung unsaon pagpangandam sa ilang kaugalingon?

⁸⁹ Ang gikinahanglan nato karon mao ang dinihogang mga mensahero gikan sa Dios! “Nabanhaw Siya gikan sa mga patay! Siya mao sa gihapon kagahapon, karon, ug hangtud sa kahangturan!” Kana ang Mensahe sa karong panahon.

⁹⁰ Oh, nagkaaduna na og halandong mga mensahe, apan ang Pasko sa Pagkabanhaw ang mismong pangtaklub nianang tanan! Halandong mismo nga mga mensahe; pero ang Pasko sa Pagkabanhaw ang tanan-nianan! Sa dihang ang mga patay . . . gipapangandam na ang katapusang kaaway . . . Nakita nato nga naayo ang mga sakit diha sa Daang Tugon. Nakita nato nga ang mga milagro nangahimo diha sa Daang Tugon. Adunay miabot nga mga panan-awon diha sa Daang Tugon. Pero diretso pa sa gihapon sa lubnganan ang matag tawo, nga nangalibog kung mabanhaw pa kaha ang tawo pag-usab. Apan niadtong buntag sa Pasko sa Pagkabanhaw, sa dihang naangkon niadtong mga tinun-an ang pinakahalandong Mensahe nga mahimong maangkon ni bisan kinsa nga tawo, unsa diay ang naangkon nila? “Lakaw, isulti sa Akong mga tinun-an, nga Ako nabanhaw gikan sa mga patay!” Nabuntog na ang kamatayon!

⁹¹ Wala’y tawo sukad sa yuta, wala’y propeta, wala’y bantugang tawo, wala’y balaang tawo sukad ang nakabuntog. . . Mahimo nilang buntogon ang mga sakit pinaagi sa Espiritu sa Dios. Mahimo nilang buntogon ang panahon, pinaagi sa Espiritu sa Dios, ug makita ang mga butang nga umaabot. Mahimo nilang buntogon kadto. Pero wala pa sukad nagkaaduna og usa ka tawo nga gidihogan sa ingon nga dihog gikan sa Dios, nga makahimo sa niini nga pahayag, “Mahimo Ko nga ihalad ang Akong kinabuhi, og pagabanhawon Ko kuni pag-usab. Gub-on man kining lawasa, Akong pagabanhawon kuni sa ikatulong adlaw.” Wala’y tawong makahimo og ingon niana nga pamahayag. Ug nakapahibulong kadto sulod sa ilang mga kasingkasing, kung matinuod ba gyud kuni o dili.

⁹² Pero sa mismong buntag niadtong Pasko sa Pagkabanhaw, nakadawat sila og usa ka Mensahe, “Panglakaw kamo ngadto sa tibuok kalibutan, iwali ang Maayong Balita ngadto sa tanang binuhat. Ako nabanhaw gikan sa mga patay. Ania karon, Ako

magauban kaninyo sa kanunay, bisan hangtud sa katapusan sa kalibutan. Siya nga nagatoo ug nabautismohan maluwas, siya nga dili nagatoo pagahukman sa silot. Ug kining mga ilhanan magauban kanila nga motoo: sa Akong Ngalan pagahinginlan nila ang mga yawa; magasulti sila og mga bag-ong sinultihan; kung makakupot sila og mga bitin o makainom man sila og butang nga makahilo, dili kini makadaut kanila; kung pagapandongan nila sa ilang mga kamot ang mga masakiton, sila mangaayo.” *Ang Mensahe Sa Pasko Sa Pagkabanhaw*, usa kini sa mga pinakamahinungdanon sa mga mensahe nga aduna sukad. Nabuntog na ang kamatayon!

⁹³ Mahunahuna nato ang usa ka mangdadaug. Si Napoleon, sa edad nga traynta’y-tres, nasakop na niya ang kalibutan. Nasakop niya ang kalibutan, gibuntog niya ang matag nasud nga mahimong buntogon. Ug grabe niyang pagkadiskurahi tungod kay wala na’y uban pang nahabilin nga sakupon, napalingkod siya ug minghilak. Wala na’y uban pa para sulongon, pero gidula niya ang mga kalagdaan sa gubat nga dili patas. Napulo ka linibo nga mga bigaon ang nanagsunod sa iyang kasundalohan, siya nanulong nga may pusil ug may espada. Sa edad nga traynta’y-tres, nasakop niya ang kalibutan. Pero bisan usa siya usa ka prohibisyonista kaniadto, pero namatay siya ingon nga usa ka grabe ka palahubog, tungod nga gidula niya ang mga kalagdaan sa gubat nga dili patas. Nalimtan niya ang mensahe. Nangbuntog siya, pero nalimtan niya ang mensahe. Nanulong siya, pero nalimtan niya kung para sa unsa ang pagpanulong niya.

⁹⁴ Sama niadtong gamay’ng batang lalaki nga nagadagan sa lumba, susama pud sa iglesia nga nagadagan karon, susama pud sa mga tawong nagadagan, sama sa nasud nga nagadagan! Ang atong luwas nga dangpanan dili mga bomba atomika, ang atong luwas nga dangpanan mao si Jesus Cristo ug ang Iyang pagkabanhaw.

⁹⁵ Nalimtan ni Napoleon ang pinakamahinungdanong butang. Unsa ma’y nahitabo sa iya? Namatay siya nga bug-os gayud nga naparot, nga hubog kaayo. Ngano man? Wala siya nagdula sa husto, bisan nga nasakop niya ang kalibutan, sa pisikal. Nag-andam siya og usa ka armadong kusog. Aduna siya’y talagsaong kabatid sa mga butang militar, gisakop niya ang matag nasud ug nahimo ang mga butang (nga siya) nga dili sukad mahimo sa ubang tawo o nahimo sukad kaniadto, nga sama kaniya, pero nalimtan niya kung unsa gyud kadtong tinuod nga mensahe. Dala na unta niya kadto, ug anaa na sa iya ang armadong kusog, pero nalimtan niya ang kusog nga iya sa Ginoo.

⁹⁶ Ang kusog sa Ginoo mao ang atong kalipayan. Wala na kita’y uban pang kusog. Wala na ko’y uban pang dalangpanan, wala! Dios malooy Ka! Kuhaa na ang akong kinabuhi, pero ayaw itugot kanako nga malimtan ko kung asa nagagikan ang akong kusog. Nagagikan kini sa Dios! Dili ko gusto ang mga maanindot nga

mga butang nga iya sa kalibutan. Ang gusto ko mao si Jesus, ang Iyang pagkabanhaw mao’y gusto kong magdilaab sa akong kinabuhi.

⁹⁷ Daku kaayo ang kalainan niana kang Jesus Cristo sa edad nga traynta’y-tres! Sa edad nga traynta’y tres, panag-iya na ni Jesus ang tanan-tanan; gibuhat Niya ang kalibutan. Ug ania Siya kaniadto sa kalibutan, ug wala Siya naila sa kalibutan. Wala gayud Siya naghimo’g kabantog sa Iyang Kaugalingon. Wala Siya’y gitigum ni usa ka sundalo. Wala gayud Siya nag-organisar og unsa man nga mga iglesia. Wala Siya sukad naghimo’g unsa man nga bantugang mga ngalan para sa Iyang Kaugalingon. Wala gyud Siya’y gipangandak og bisan unsa man nga mga digri pang-doktrina, teolohiya, ug uban pa, wala gyu’y rekord mahitungod Kaniya nga naka-eskwela sa bisan unsa man nga eskuwelahan pangteolohiya. Pero anaa sa Iya ang Dios. Anaa sa Iya ang Dios. Ug sa edad nga traynta’y-tres, nabuntog na Niya ang matag yawa nga nagpagimaw sa ulo niini gikan sa impiyerno. Nabuntog na Niya ang mga sakit. Nabuntog na Niya ang mga tuo-tuo. Nabuntog na Niya ang mga yawa. Nabuntog na Niya ang kamatayon. Ug sa dihang namatay Siya didto sa krus, nanaug Siya ngadto sa wala’y kahaladman nga bung-aw sa impiyerno, ug gibuntog ang impiyerno.

⁹⁸ Ug niadtong buntag sa Pasko sa Pagkabanhaw gibuntog Niya ang lubnganan. Ngano man? Gidula man Niya og husto ang mga kalagdaan sa dula, nagadagan nga dala-dala ang Mensahe. Ingon nga dala Niya, nagsangyaw Siya! “Lakaw.” Gipadala Siya sa Dios, ug dala Niya ang Mensahe nga isulti Niya ngadto kanila. Ug pinaagi sa Mensahe nga gihatag sa Dios Kaniya, gibuntog Niya ang mga gahum ni Satanas. Gibuntog Niya ang mga sakit. Gibuntog Niya ang kamatayon. Gibuntog Niya ang impiyerno. Gibuntog Niya ang lubnganan. Ngano man? Miadto man Siya! “Lakaw, isulti!” “Kanunay Kong ginabuhat kung unsa’y ginapakita sa Ako sa Akong Amahan nga pagabuhaton. Dili Ako magabuhat og bisan unsa man gawas ra sa kadtong mga ginasulti Niya Kanako nga pagabuhaton.”

⁹⁹ Dayon sa wala pa Siya mamatay, gisulti Niya kini, “Maingon nga gipadala Ako sa Amahan, mao man usab kamo nga igapadala Ko.” Dili para mag-organisar og mga tawo pinaagi sa armadong kusog; dili aron igahin ang inyong tanang panahon sa kung kinsa ang mamahimong Presidente. Tingali kinahanglanon man kana, pero dili kana kinahanglanon *Niini*. Palaglag na ang kalibutan. Aduna kita og usa ra ka Mensahe, kana ang, nabanhaw si Jesus Cristo gikan sa mga patay, ug Siya mao sa gihapon kagahapon, karon, ug hangtud sa kahangturan.

¹⁰⁰ Kagahapon, didto sa korte, gipaningkamotan nila nga pasultihon ako og usa ka butang nga dili husto. Ingon ko, “Dili ako usa ka limbongan.” Ingon ko pa, “Ako—ako—matinud-anon

akong pagkatawo. Ug dili ka makasulti'g bisan unsa kondili kung unsa ra gyud ang kamatuoran.”

¹⁰¹ Ug ang lalaki sa tapad ko, miingon, “Kung istoryahon ako sa usa ka tawo nga ingon niana, basin unya malabay ko pa siya og libro.”

¹⁰² Ingon ko, “Ayaw, sir. Ayaw, dili kana husto. Dili ingon niana ang pamaagi para isulbad kini. Dili kana husto.”

¹⁰³ Ingon niya, “Bueno, nganong wala ka kabalo nga nagakahitabo na diay ang ingon niining mga butang? Nganong wala man ka didto samtang ginabuhat kini?”

Ingon ko, “Gigahin nako ang akong panahon sa pagpangalagad kang Jesus Cristo.”

¹⁰⁴ Oh Dios, oh, ang mga tawo buta na ug dili gyud kini makita! “Maingon nga gipadala Ako sa Amahan,” ang Amahan man ang nagpadala Kaniya, gipaadto Siya. Aduna Siya’y dala nga Mensahe para isulti sa mga tawo. Ug diha sa oras sa kamatayon, gibuntog Niya ang kamatayon ug gibuntog niya ang impiyerno, ug gibuntog Niya ang lubnganan. “Maingon nga gipadala Ako sa Amahan nga dala ang Mensahe, gipadala Ko pud kamo nga dala ang Mensahe; dili para magtukod og mga simbahan, mga organisasyon, kondili panglakaw kamo sa tibuok kalibutan ug ipakita ninyo ang Gahum sa Espiritu Santo. Kining mga ilhanan magauban kanila nga nagatoo; sa Akong Ngalan maghingilin sila og mga yawa, magsulti sila og bag-ong mga sinultihan, makakupot man og mga bitin.” Ug bisan nga ang atong mga lawas mopadulong ngadto sa lubnganan, susama sa Iyang gibuhat, Gibuntog na Niya pareho ang kamatayon, impiyerno, ug ang lubnganan. Siya mao ang gamhanang Mananakop.

¹⁰⁵ Ginapadala Niya kita nga dala ang Iyang Mensahe. Manglakaw kita nga may dalang Mensahe, magsangyaw kita nga adunay igasulti. “Lakaw, isulti!” Ayaw’g dagan ug dayon dili ninyo masulti, ato una Kini ipasulod sa ato mismong kasingkasing.

¹⁰⁶ Sa dihang moduol kamo para iampo, karong buntaga, ayaw pagduol nga basta-basta na lang. Pagduol nga dala ang Mensahe sulod sa imong kasingkasing, “Ako mao Siya nga namatay, ug nabuhi pag-usab. Ako Mao ang naghatag sa Mensahe, ‘Kining mga ilhanan magauban kanila nga nagatoo.’” Kung mahimo sa Gamhanang Dios nga—nga ang usa ka gamay’ng libat nga bata maibalik sa normal ang iyang panan-aw; Mahimo sa Dios nga gamiton ang usa ka bata, usa ka batang lalaking gihimugso, nga wala pa sukad nakakita sa tibuok niyang kinabuhi, ug dise-sais na ang edad, nga ibalik kaniya ang iyang panan-aw; mahimong gamiton sa Dios ang usa ka makalooloy’ng alaut nga tawo nga halos giut-ut-na sa kanser. . .

¹⁰⁷ Ug tungod nga husto ang Mensahe, tungod nga gipadala sa Dios ang Mensahe, tungod nga gipadala sa Dios ang

mensahero, wala’y duda nga nakapunterya gayud ang mga pusil sa impierno ngadto kaniya. Husto kana, madagma man siya ug mahulog, ug mobangon ug maglingo-lingo sa iyang ulo, ug magpadayon sa gihapon. Aduna kita og usa ka Mensahe, wala na’y makapugong Niini! Alleluyah! “Ibabaw niining bato Akong pagatukoron ang Akong Iglesia, ug ang mga ganghaan sa hades dili makahimo sa pagbuntog Niini.” Isulti na nila ang gusto nilang isulti, buhaton ang gusto nilang buhaton, masuko na ug mag-uwang man ang yawa. Pero nabanhaw na si Jesus gikan sa mga patay, buhi Siya karon sa sulod kanato!

¹⁰⁸ Pila ka mga adlaw na ang milabay, naistorya ko ang bantugan nga si Doktor Lamsa, nga naghubad sa Biblia gikan sa Aramaic, ngadto sa Ingles. Ug nakita ko ang gamay’ng simbolo, simbolo nga nagpahanungod sa Dios didto, nga adunay tulo ka gagmay’ng tuldok. Ingon ko, “Doktor Lamsa, unsa man kana?”

Ingon niya, “Ang Dios kini, diha sa tulo ka kinaiyahan.”

¹⁰⁹ Ug ingon ko, “Buot mo bang ipasabot, ang Dios nga nagpuyo sa tulo ka opisina, ingon nga, Amahan, Anak, ug Espiritu Santo?”

¹¹⁰ Mitindog siya ug mitan-aw sa ako, mitulo ang luha sa mga mata niadtong Judio, ingon niya, “Nagatoo ka ba niana, Igsoong Branham?”

Ingon ko, “Sa tibuok kong kasingkasing.”

¹¹¹ Gigakos gyud niya ako, ug miingon, “Nahibulong gyud ko sa dihang nakita ko didto ang mga dagkung butang nga nangahitabo, ug ang mga ilhanan nga ginapangbuhat mo.” Ingon pa, “Gisulti nila sa ako nga usa kono ka ka propeta. Wala ko kado toohi, hangtud karon. Pero karon kabalo na ko mismo nga ikaw usa ka propeta.” Ingon niya, “Husto kana! Kana ang Mensahe. Kana ang butang nga magtay-og sa Ginghamarian sa Dios.” Oo. Ingon pa niya, “Moabot ang adlaw nga mamatay ka gayud tungod niini, dong.” Ingon pa, “Pagaselyohan mo ang imong pagpamatuod pinaagi nianang mao ra mismong butang.”

¹¹² Usa siya sa mga pinakahalangdong tawo nga nagkaaduna kita, sa dihang si Eisenhower mismo ug mga inilang kalalakenan sa kalibutan, ang mga taga Hollywood, tanan na nga matang sa mga artista sa salida ug tanan na nagapanawag nga ginapaadto siya, apan nagpabilin siya mismo didto sa tigum. Ingon niya, “Halos traynta ka tuig ko, nga gihubad kini, dili gikan sa Vatican Greek, kondili gikan sa Aramaic; diretso mismo gikan niana, gikan Aramaic, ngadto sa Ingles.” Ug ingon pa niya, “Gigahin ko ang tanan kong panahon niana,” ingon niya, “pero karon lamang ako nakasulod sa lugar kon diin nakita ko ang Dios sa Biblia, nga nagapamuhat.” Ingon niya, “Kabalo ka, Igsoong Branham, makita man namo ang mga ilhanan ug mga katingalahan, apan ang ginabantayan namo maoy kung unsa nga Tingog ang anaa sa maong ilhanan. Kami nga mga Judio,

makita man namo ang usa ka ilhanan, pero ang ginabantayan namo maoy kung unsa ang Tingog sa maong ilhanan.”

113 Oh, alleluyah! Ang Tingog sa ilhanan! Gisulti sa Dios kang Moises, “Kung dili nila paminawon ang Tingog, ang Tingog sa unang ilhanan, nan paminawon nila ang Tingog sa ikaduhang ilhanan.” Dili kaayo sa ilhanan, kondili ang Tingog mismo nga minunot Niini.

114 Kita n’yo, kana nga Judio, kabalo siya kung unsa’y iyang ginasulti. Ingon niya, “Nakakita na ako og mga pagpang-ila, nakakita pud ako og mga ilhanan, mga katingalahan, nga ang mga buta nangaayo, ug tanan nang klase sa nagkalainlaing mga ilhanan, pero sa hunahuna ko, pero ang gusto kong makita nga Tingog sa luyo niini maong dili ginabahinbahin ang Dios sa tulo ka bahin, ug nagaingon, ‘Siya maoy usa ra ka Dios, ang Amahan, ug ang sunod, ang Anak, . . .’ Ingon niya, ‘ang Dios mao’y Dios: tulo ka kinaiyahan sa Dios; tulo ka opisina sa Dios.’” Ingon pa, “Kana ang nagakumpirma niini.”

115 Oh, igsoon, aduna gyud kita og usa ka Mensahe! “Lakaw, isulti sa Akong mga tinun-an! Dili ako *kadtong* namatay, ug ni kadtong *usa pa* nga hapit namatay, ug ang *usa* nga buhi. Ako Mao ang Kaniadto, ang Karon, ug Ang Umalabot; ang Gamut ug Kaliwat ni David; ang Masidlak nga Bitoon sa Kabuntagon.” Yes!

116 Unsa man ang kapuslanan nga mahatag sa pagsangyaw, ang pagsangyaw, kung wala ka’y usa ka butang nga isulti? Kinahanglan aduna gyud ka’y butang nga isulti, husto kana: “Si Jesus Cristo, ang Anak sa Dios, gihigugma kamong tanan. Namatay Siya para kaninyong tanan. Higugmaa ninyo si Jesus Cristo ang Anak sa Dios.”

117 Pila na ang nakatambong sa mga tigum, ug nasaksihan ang dagkung mga ilhanan ug mga katingalahan sa Iyang—sa Iyang pagpakita, kung giunsa Niya sa pagpang-ila ug pagpasundayag, ug ingon nianang mga butang? Kana ang Dios sa Langit, Nga nabanhaw gikan sa mga patay.

118 Angay gyud unta n’yong makita ang ilhanan sa Hebreohanong ilhanan Niini. Kini usa ka Kahayag, sama sa usa ka Haliging Kalayo, ug niana adunay tulo ka mga gagmay’ng marka, Amahan, Anak, ug Espiritu Santo, nga dili tulo ka persona. Kini mao’y usa ra ka Dios nga nagakinabuhi diha sa tulo ka opisina. Ang usa ra ka Dios! Alleluyah! Ang Dios anaa sa ibabaw ninyo, ang Dios nga kauban ninyo, ang Dios nga anaa sa sulod ninyo. Ang Mao ra nga nagpaubos sa Iyang Kaugalingon, nga gihinloan ang Iyang Iglesia, aron Iyang pagapuy-an. Kung putolputolon ninyo Siya, ug ibutang ang usa ka bahin sa *niining* lugar, ug ang usa pud ka bahin sa *niining* lugar, ang usa pa *didto*, paganhon mismo kini.

¹¹⁹ Nagatoo ako sa pagkabanhaw ni Jesus Cristo, nga nabanhaw Siya gikan sa mga patay. Ug Siya lamang ang Tawo nga makasulti niana, “Ang tanang kagahum sa Kalangitan ug sa yuta gikahatag sa Akong kamot. Ang tanang kagahum sa Kalangitan ug sa yuta gikahatag sa Akong kamot. Lumakaw kamo sa tibuok kalibutan, ug iwali ninyo ang Maayong Balita sa tanang binuhat.” Ang Maayong Balita wala miabot sa pulong lamang, kondili pinaagi sa gahum ug sa mga pagpasundayag sa Espiritu Santo. Tabangan unta kamo sa Dios nga toohan kana, tabangan unta ako sa Dios nga toohan kana, ug makita nato si Jesus sa umalabot nga adlaw.

Kung ang mga kahago sa kinabuhi matapos na,
Makita na nato si Jesus sa kaulahian;
Sa Iyang matahum nga Trono Abiabihon Niya
akong dawaton sa Balay,
Pagnahuman na ang adlaw. (Husto kana.)
Nabanglas na ang mga balas nga anaa ang mga
tunob
Sa maong Estranghero gikan sa baybayon sa
Galilea.

¹²⁰ Gipatay nila Siya tungod kay gihimo Niyang Dios ang Iyang Kaugalingon, ug Siya ang Dios. Gibitay nila Siya, tungod kay, namatay Siya ilalum sa silot nga kamatayon. Kana ang hinungdan kung ngano dili ako uyon sa silot nga kamatayon. Namatay si Jesus sa ilalum sa—sa silot nga kamatayon gikan sa federal nga gobyerno sa Roma. Ang silot nga kamatayon kaniadto, mao’y, pagbitay sa usa ka krus. Namatay Siya ilalum sa silot nga kamatayon, gihuboan Siya sa Iyang mga bisti, ug gibitay didto, gipakaulawan Siya, ug namatay Siya sa ingon nianang kahimtang. Pero gibanhaw Siya sa Dios sa ikatulo nga adlaw!

¹²¹ Ug kita ang Iyang mga saksi. Ug kung dili kita mobarug para Kaniya, kinsa man ang mobarug para Kaniya?

¹²² Nakighimamat sa ako ang usa ka tawo niadtong miaging adlaw, miingon, “Oh, Igsoong Branham, ayaw pagbadlonga. Undangon mo na ang pagpangbadlong. Imong—gipasakitan mo ang pagbati sa mga babaye, mahitungod nianang pagpamugbo sa ilang mga buhok, ug mahitungod sa pagbuhat nila sa *niini* ug pagbuhat sa *niana*, ug uban pa nga ingon niana.”

¹²³ Ingon ko, “Kung dili nako sultihan sila, kinsa man ang magsulti kanila? Kinsa man ang magsulti niini?”

Ang ingon pa, “Bueno, gipasuko mo man gud sila nga mga magwawali.”

¹²⁴ Mas gustohon pa nako nga masuko sila sa ako, kaysa Kaniya. Kini ang Kamatuoran. Husto kana! [Blangko nga bahin sa teyp—Ed.] Husto. Kinsa man ang magsulti niini? Kinahanglan aduna’y magsulti niini.

125 Gisulti ni Jesus, “Lakaw, isulti. Lakaw ug isulti, isulti sa Akong mga tinun-an nga nabanhaw Ako gikan sa mga patay. [Blangko nga bahin sa teyp—Ed.] Ania karon, Ako magauban kaninyo sa kanunay, bisan hangtud sa katapusan sa kalibutan.”

126 Nagatoo ba kamo niana, mga higala?

Mag-ampo kita, samtang ginaduko nato ang atong mga ulo karon para sa pag-ampo.

127 Oh Amahang Dios! Tinuod gyud, “Lakaw, isulti. Lakaw, isulti sa Akong mga tinun-an nga Ako nabanhaw gikan sa mga patay.” Ug Amahang Dios, dili lamang nga gisultihan Mo ang Imong mga tinun-an, kondili gipamatud-an Mo pud kanila nga Ikaw nabanhaw gikan sa mga patay. Gipakita Mo ang Imong Kaugalingon uban kanila, ug namuhat Ka didto sa ingon ka eksaktong paagi nga gibuhat Mo sa wala Ka pa mamatay. Dise-nuebe na ka tuig ang nangagi ug minglabay, Ginoo, nagadilaab sa gihapon ang Mensahe. Kini’y sama ka kahayag ug nagadilaab sa among mga kasingkasing karon kung unsa kini kaniadto sa ila nga mga tinun-an, tungod nga nakita namo ang nabanhaw nga Ginoo sa among taliwala, nga ginabuhat ang mga butang nga ginapangbuhat Niya kaniadto. Kabalo kami nga Siya nabanhaw gikan sa mga patay.

128 Mahinungdanon kaayo ang Pasko sa Pagkabanhaw para sa kanamo, tungod nga kami nagkaduyog ug gitagamtam ang pagpakigfellowship sa Iyang pagkabanhaw. Kay kami kaniadto patay sa kasal-anan ug mga kalapasan, sama sa mawaldason nga anak, pero karon nakakaplag kami og grasya, ug gipasaylo na kami sa Dios sa among mga kasal-anan. Gihatag usab Niya kanamo ang Selyo, sama sa gihatag Niya kang Amahang Abraham, aron sa pagpamatuod nga gidawat Niya kami. Gisulti ni Amahang Abraham kaniadto nga siya nagtoo sa Dios, pero gihatag sa Dios kaniya ang selyo sa pagcircuncida isip pagpamatuod nga nagtoo siya Kaniya. Ug karon, Amahan, niining adlaw gicircuncidahan kami pinaagi sa Espiritu Santo, ang tanang butang nga iya sa kalibutan nangawagtang na. Aduna kami og usa ra ka tumong: ang pag-alagad Kanimo. Aduna kami og usa ra ka tinguha: ang higugmaon Ka, ang mahimong tinun-an Mo.

129 Ug karon, Ginoo, nangamuyo ako nga Imong pamatud-an kining putol-putol nga mensahe ngadto sa matag kasingkasing. Ayaw pasagdi nga ilang mapalabay kini. Ipakita kanila nga Ikaw mao sa gihapon kagahapon, karon, ug hangtud sa kahangturan, nga ania Ka, nga nabanhaw gikan sa mga patay, ug mamahimong hangtud sa—sa ang Espiritu ug ang lawas maghiusa pag-usab sa Ikaduha Mong Pag-anhi.

130 Nangamuyo ako para sa mga masakiton nga ania dinhi, Amahan, karong buntaga. Ako na karon, sa niining buntag sa Pasko sa Pagkabanhaw, gipadaplin na (o, dili gipadaplin diay,

kondili gibutang lang sa kadali) ang mga gasa nga Imong gihatag kanako, sama sa espirituhanong pagpang-ila. Sa kalibutan, dugay na akong nagsige adto sa mga nasud, Ginoo, kabalo silang tanan niini. Karon nag-ampo ako, nga, ang gihatag Mong Mensahe sa ako didto sa mga kakahoyan, nga, pipila na ka adlaw ang milabay, nga, pinasikad nianang makapaglalang nga gahum nga ania niining iglesia karong buntaga, ang mismong mga tawo nga tungod kanila gipanglalang kini, Nangamuyo ako, Dios, nga sa pagduol ko aron pagapandongan sa akong mga kamot sila nga mga may sakit karong buntaga, kauban sa mga kaigsoonan ko dinhi, nga Ikaw magakunsad sa niining iglesia karong buntaga, nga may kalooy, ug nga Imong ayohon ang mga tawo, nga wala na ni usa man ka tawo nga maluya sa among taliwala sa dihang matapos na ang panerbisyo. Hinaut nga ang matag kanila mapanalanginan ug mamaayo na.

¹³¹ Naamgo namo, Ginoo, nga kini dili sa unsa mang butang nga mahimo namong buhaton sa among kaugalingon. Kondili sa simpli lang nga pagtoo nga sama sa bata, nga nagatoo gayud. Makita namo ang mga tinun-an kaniadto sa tapos nga sila gikahatagan og gahum sa pagpang-ayo sa mga may sakit, miadto sila ug napakyas diha sa usa ka patol nga sakit; nga nanagsiyagit ug nanaghilak pa, siguro, ug nanaglukso-lukso, ug naninguha nga mapahawa kadto nga yawa. Pero sa dihang nahinagbo kadto ni Jesus, oh, lahi ra gayud! Ang ingon Niya, “Ikaw nga dautang espiritu, gumula ka gikan kaniya.” Pagkalahi ra gyud! Oh, kabalo siya nga dili na Kadto ang mga tinun-an. Ang Ginoo na Kadto Mismo. Ug gibidbid sa espiritu ang batang lalaki ug gitumba siya sa yuta. Pero gisulti ni Jesus, “Dili siya patay. Patindoga n’yo lang siya ug hatagi siya og makaon.” Mibiya ang dautang espiritu.

¹³² Oh Jesus, Ikaw nga Anak sa Dios, magkunsad pag-usab, gawasnong pangdihogi ang Imong Iglesia, sa hingpit, diha sa gamhanang paagi. Hinaut nga ang Espiritu sa buhi ug nabanhaw nga si Jesus banhawon pag-usab kining gamay’ng iglesia karong buntaga ngadto sa usa ka bag-ong pagtoo, gahum, gahum sa pagtoo, aron mapaulawan namo kining matag nanagsupak. Itugot kini, Ginoo. Ginatugyan ko kining tanan nga mga tawo nganha Kanimo, nangamuyo nga panalanginan Mo sila ug hatagan sila og kaluwasan sa ilang mga kalag, kaayohan sa ilang mga lawas, pinaagi ni Jesus Cristo nga among Ginoo.

¹³³ Ug samtang nakaduko ang atong mga ulo, ipangutana ko lang kining pangutana. Aduna ba dinhi nga dili pa Cristohanon, nga gustong mahinumduman karon, ug moingon, “Iampo ako, Igsoong Branham”? Panalanginan ka sa Dios dinha. Aduna pa ba’y uban, “Dili ako Cristohanon. Nadungog ko na ang balita nga nabanhaw si Jesus gikan sa mga patay, pero wala gayud ko’y hingbaloan bahin niini. Wala pa Siya nabanhaw sa sulod sa akong kasingkasing. Wala pa ko’y katagbawan. Nagmasakiton

ako, usab. Nagaapil-apil ako diha sa linya sa pagpaampo, mobalik ug moapil sa usa pa ka linya, mobalik ug moapil na usab sa usa ka pa ka linya. Nagbalhin-balhin ako og simbahan, ug pabalhin-balhin og lugar.” Dili ingon niana. Kini mao ang pagtoo lang Kaniya. Siya nabanhaw gikan sa mga patay. Mao na kana. Aduna pa ba’y uban nga gustong ipataas ang imong kamot? Moingon . . . Panalanginan ka sa Dios. Panalanginan ka sa Dios. Aduna pa ba’y uban, “Gusto kong motoo. Gusto kong motoo”?

¹³⁴ Pila man ang ania karon nga nagmasakiton? Ipataas ang inyong kamot, moingon, “Gusto kong motoo. Gusto kong mahibaloan ang Mensahe karong buntaga.” Panalanginan ka sa Dios. Maanindot kana. Oo, ang Dios magapanalangin kanimo, dong. Maayo. Sige.

¹³⁵ Karon, Teddy, gusto kong tugtogon mo ang “*The Great Physician*,” sa kadali lang, kung mahimo mo, “now is near.” Ug samtang ginabuhat mo kana . . .

¹³⁶ Medyo malisud na kana. Nangtungha na ang mga pananawon sa tibuok bilding, kita n’yo. Oo, naningkamot ako nga, gipaningkamotan ko, gipaningkamotan kong mamahimo kining usa ka pagkabanhaw, nga medyo mas taas pa, nga medyo mas taas pa gikan sa—gikan sa tapok sa abo nga gilingkoran ko. Gusto ko og dugang pa nga kapadayagan. Kabalo ko sa usa ka butang: Samtang nga nagapabilin pa ako sa unang ministerio, dili moabot ang ikaduha. Samtang nga nagapabilin pa ako sa ikaduha, dili pud moabot ang ikatulo, kita n’yo. Kinahanglan kong motikang pa, motikang pa ug toohan kini, “Mao kana ang gisulti sa Dios!” Pipila ka adlaw na ang milabay . . .

¹³⁷ Karon mahimo na ninyong iyahat ang inyong mga ulo karon kung gusto ninyo. Nakita ko na ang inyong mga kamot; nakita pud kana sa Dios.

¹³⁸ Gusto kong isulti sa inyo ang usa ka gamay’ng butang. Si Igsoong Ed Daulton, sa nahibaloan ko bag-ohay lang siya misulod sa pultahan, buotang igsoong Baptist, siya ug ang iyang asawa. Ania pud si Igsoong Jeffries sa kung asang dapita. Si Othel Jeffries. Ug ania siya dinhi, kabalo ko nga ania siya dinhi sa kung asa mang dapit. Bisan pa niana, silang mga magsoon nagplano og usa ka panagtigum para paadtoon ako, didto sa Kentucky. Mga kaigsoonan, bilihong mga igsoon, nga mahigugmaon sa ilang silingan ug sa ilang katawhan. Nangabang sila og mga awditoryum ug mga bilding pang-armory ug uban pa, para lamang sa usa ka gabiing panerbisyo, giabangan nila ang maong mga armory. Ang gamay’ng si J. T. Hoover, kung unsa man ang iyang . . . Si L. G. Hoover nagplano pud og usa didto sa Elizabethtown. Ug si Igsoong Ed Daulton didto pud sa Willow Shade o—o sa Somerset, Somerset. Ug ang igsoon, ang usa pa ka igsoon aduna pud didto sa lugar sa

Glasgow, kon diin didto ako natawo. Para gyud kadto sa mga tawo didto kon diin ako natawo ug gipadaku, kon diin didto unang nagpakita ang Manulonda sa Ginoo kanako.

¹³⁹ Ug gusto kong mobalik. Pero nagbati ko og diyutay'ng pagtukmod. Ug ingon ko, "Buena, para sa kaayohan sa mga kaigsoonan, igapahigayon ko ang maong panerbisyo." Pag-abot gyud nako niining walog, nanghubag dayon ang akong tutunlan ug naglisod ko og sulti sulod sa siyam ka adlaw, hangtud sa milagpas na lang ang mga panagtigum.

¹⁴⁰ Si Igsoong Ruddell, siguro ania siya karong buntaga, usab, usa sa mga igsoon nga taga-dinhi sa tabernakulo, siya ug si Junie Jackson ug ang uban pa, aduna unta ko'y miting para sa iya. Ug basta na lang, nanghubag ang akong tutunlan. Ug mahibaloan mo na lang, gihilantan ako og mga gatus ug lima ang temperatura. Ug paadto na unta ako sa tigum, ang una, ug—ug ang ingon sa ako ni Doc Schoen. . . Ingon ko, "Napagaw man gud ang akong tutunlan."

¹⁴¹ Ingon niya, "Duna ko'y ihatag sa imo para mapaluag kanang tutunlan mo, ug magpadayon ka lang ug magwali." Ug giinom nako kadto kung unsa'y uban pa nga gihatag niya sa ako, ug, kung unsa man kadto, gibira hinoon niadto paubos ang sinus ko ug giping-ot kini. Dayon naghigda na lang ako sa higdaanan sulod sa siyam ka adlaw, nga may taas kaayo nga hilanat.

¹⁴² Daghan sa mga kaigsoonan ko dinhi ang nagduaw sa ako, daghang kailang mga igsoon ang nagduaw para iampo ako. Miabot si Igsoong Graham Snelling, miabot pud si Igsoong Ruddell, ang tanan sa niining mga igsoon dinhi, nanagtigum ang tanan, nanag-ampo ug tanan nang uban pa. Nag-ampo pud ako, naningkamot kutob sa mahimo ko, lisud gyud bisan man gani sa paghunghung na lang unta. Natingala gyud ko, "Nganong naingon-ani man kini?" Ang hiligugmaon kong asawa nga naglingkod dinha, siya ug sila nanag-ampo para sa ako, pero nagpabilin nga mao ra gihapon nga way-kausaban. Dili na nila kadto masabtan.

¹⁴³ Karon, gihatagan niya ako og pipila ka tambal para imnon, pero dili nako mainom, tungod kay makapa-adik man kadto. Ug dayon gipasagdan ko na lang. Ug padayon akong naghunahuna, "Ginoo, grabe gyud!"

¹⁴⁴ Ug dayon, pagkahuman na niadtong mga tigum, niadtong mag-Lunes na (kana mao, ang katapusan sa tigum, niadtong Sabado unta), ug dayon (sa tan-aw ko), ug pagkahuman, gipanguhaan nakong mobangon pagka-Lunes. Luya kaayo ko, maglisud gani ko maglakaw sulod sa kwarto. Milingkod na lang ako.

¹⁴⁵ Kabalo mo, mapasalamaton kaayo ko sa usa ka hinatag-sa-Dios nga asawa. Dili ba kamo pud, mga igsoon? Usa ka tinuod nga asawa, usa ka tinuod nga kaabag!

¹⁴⁶ Milingkod ako. Gisenyasan ko siya, ug gipaduol nako siya sa ako. Ug ingon ko, “Meda, usahay makahunahuna ko,” ingon ko, “gahunahuna gyud ko, unsa kaha’y problema.” Ingon ko, “Ngano kaha nga may mga panagtigum didto, ug gipasagdan ako sa Dios nga maghigdaay nga ingon niini?” Ingon ko, “Nganong ingon-ani man?” Ug ingon ko, “Usahay makahunahuna gyud ko kung gitawag ba gyud Niya ako.”

¹⁴⁷ Ingon siya, “Dili ka ba maulaw sa imong kaugalingon?” Kita n’yo? Ug gisulti niya sa ako, miingon, “Bill, wala ka ba makabalo nga nahibaloan sa Dios kung unsa’y ginabuhat Niya sa imo? Basta, magkalma ka lang.”

¹⁴⁸ Ug busa misulod na ako. Medyo nabadlong ako niadto, kabalo na mo. Ug busa misulod na ako ug mihigda sa higdaanan. Misulod pud siya para pulihan ang mga habol. Ug gibutang niya ang—ang maong mga butang gigunitan niya sa iyang bukton, ug niadtong pagawas na siya, mitan-aw ako, ug adunay usa ka . . .

¹⁴⁹ Nakita ko ang usa ka da- . . . usa ka dakung bilding pang-armory, nga nasidlakan sa adlaw ug mibuto sa yuta, mibungkag kadto tungod sa pagbuto, nga nagasidlak ang adlaw gikan sa Langit. Ug dunay tulo ka babaye ug usa ka lalaki, nga miabot. Ug nagpagawas sila og mora’g gamay kaayong, mora’g gamay’ng . . . kung unsa nga klase sa gamay’ng pusil, nga ingon-ana. Ug ingon niya, “Mao kana ang nagapalubong sa mga lansang.” Ug ingon pa, “Bueno . . . Gunitan mo kining mga nangabungkag, Igsoong Branham, ug tukoron nato pag-usab kining armory para sa imo.”

Ug ingon ko, “Sige, gunitan ko.”

¹⁵⁰ Pero Dunay nagsulti, “Ayaw kana buhata.” Bueno, pudyoton ko na unta kadtong usa ka nabungkag nga bahin, nga ingon *niini*, para tukoron kadto nga sama *niini*. Ug niadtong tungora nagsulti kanako ang Tingog, ug nagsulti, “Karon nagpadulong na sila para pabalikon ka. Ayaw gyud toohi kini.” Ingon pa, “Sinsero kaayo sila, ug anhaon ka nila nga dunay MAO KINI ANG GINAINGON SA GINOO, pero sayup sila.” Kita n’yo?

¹⁵¹ Si Fred Sothmann, daghan kanila dinhi, ang atua mismo didto niadtong gisulti ko sa ila ang mahitungod niini. Wala pa’y usa ka oras, miabot gyud sila diha sa akong pultahan. Ingon ko, “Dunay tulo ka babaye, ug usa ka lalaki.”

“Eksakto gyud kana.”

“Miabot sila nga dunay MAO KINI ANG GINAINGON SA GINOO?”

“Oo, sir, sila . . .”

¹⁵² Ingon ko, “Sige, kabalo na mo kung unsay isulti sa ila.” Mga sinsero pero sayup, nakita n’yo. Maayong mga tawo, sinsero kaayo pero sayup. Kita n’yo?

¹⁵³ Dayon nahunahuna ko, “Bueno, unsa ma’y mahimo kong buhaton? Unsa ma’y angay kong buhaton?” Ug dayon misulod

si Meda, ug mibalik na siya. Ug miadto si Igsoong Freddie ug gisultihan kadtong mga tawo. Ug dayon pagkataudtaud, atua ako didto sa—sa higdaanan, ug nahunahuna ko, “Nganong nahitabo man kini nga ingon niana? Nganong dili man ako makasulti? Nganong dili man ako makahimo nga makigsulti sa kang kinsa, o kung unsa pa?” Ug atua lang ako didto nga naghigda. Ug misulod si Meda, ug pagawas na pud siya niadto sa kwarto.

¹⁵⁴ Ug mitan-aw ako, ug dunay nakita ko nga nagkipat-kipat didto sa usa ka kilid. Ug gitan-aw nako, ug atua kining... naabli ang bongbong ko, ug nakita nako si Jesus. Pila na ba sa inyo ang nakadungog nga gisulti ko na kana nga nakita ko si Jesus duha ka higayon sa akong kinabuhi, diha sa usa ka panan-awon? Ug nagtoo ko nga makita nako Siya pag-usab sa dili pa ang katapusan sa panahon, kita n’yo, makita Siya pag-usab. Karon, gitan-aw ko, ug atua mismo didto ang kawanangan, nga mora ba’g nagtan-aw lang ako nga lahus-lahus sa bongbong. Ug adunay Biblia didto nga nakaingon *niini*, daku kaayong Bibliang atua mismo sa kawanangan. Bueno, dunay usa ka butang nga naghayag sa palibot niadtong Biblia, ug migawas gikan sa Biblia ang usa ka maanindot kaayo nga bulawang krus. Ug nagtindog kadto nga ingon *niini*, ug nagagikan kadtong mga kahayag sa tibuok palibot niini, ug gikan niadtong krus milakaw si Jesus. Gipadan-ag niadtong Biblia kadtong krus, gipadan-ag pud Siya niadtong krus. Ug ania Siya nagalakaw pagawas niadtong, ug naglakaw Siya paingon mismo sa akong nahimutangan. Makita nako kadto nga klarong-klaro, makita nako kadtong krus nga gipadan-ag ang Iyang buhok nga atua, nakabuhayhay ibabaw sa Iyang nawong.

¹⁵⁵ Mitambo Siya kanako nga sama *niini*, ug misulti Siya kanako, “Ginahulat mong kumpirmahon sa imo ang bag-o mong ministerio.” Ingon Niya, “Gikumpirma Ko na kini sa imo. Nakumpirma na kini. Kinahanglan mo kining dawaton.” Kita n’yo? Ug mitindog ako ug naminaw Kaniya sa kadali. Ug misantop kini sa akong hunahuna. Wala ko kadto madungog, basta lang kadto nga misantop sa akong hunahuna.

¹⁵⁶ Sama sa usa ka tawo nga makasasala sa tibuok niyang kinabuhi, ug kabalo siya nga adunay Biblia, kabalo siya nga adunay Dios, pero usa ka higayon may nadungog siyang usa ka wali, dayon Adunay misulti kaniya, “Ikaw kini.” Kung ingon-ana, kanang mao ra nga Pulong nga atua na daan sa tanang panahon, pero gikumpirma na Kini ngadto kaniya, dayon magaingon siya, “Ginoo, pasayloa ako.” Pero wala kini’y mahatag nga kaayohan gawas nga iyang pagadawaton usá ang iyang kaluwasan, ayha na dayon siya mabutyag ug usa na ka Cristohanon. Bisan unsaon pa niya paghilak, bisan unsaon pa niya pagpakilooy, kinahanglan niyang dawaton usá Kini.

157 Ug gisultihan Niya ako dayon, “Kinahanglan nga dawaton mo kini sa mao rang paagi. Kinahanglan nga toohan mo gyud kini.”

158 Gikahadlok ko ang pagkapildi. Unsa mang butang, nahadlok ako nga magdala ako og pagpasipala. Gikahadlok ko kana sa kanunay, nagbantay gayud, naghunahuna nga basin ako makasulti og sayup nga butang. Tungod nga, gitiman-an ko ang pasidaan diha sa Biblia, kung unsa nga gikahatagan kaniadto si Moses og dakung gahum, ug gibunalan niya ang bato imbis nga sultihan kini. Nahanumdum ako kang Elias, tungod sa naupaw na siya, gibiyabiya siya niadtong gagmay’ng mga bata ingon nga siya’y upaw; ug gitunglo niya kadtong mga bata, ug kwarenta’y-dos kanila ang gipatay sa mga oso, nakita n’yo. Ug dili kadto ang Balaang Espiritu, kondili ang propeta lang kadto, nga nasuko. Ug akong—nabasa ko ang tanan nianang mga butang, nga padulong gyud kini sa ingon niana.

159 Ug nagtindog Siya didto, nga nagpakigsulti kanako. Ug ang giingon Niya, “Pero nagalakaw kang kuyog ang daghan kaayo.” Ingon Niya, “Kung maglakaw ka nga uban Ako, maglakaw ka nga mag-inusara.”

160 Nakita ko dayon, nga sobra na diay ang paghatag ko og pagtagad sa mga denominasyon ug tanan-tanan, nakita n’yo, sa mga tawong gapaninguhang diktahan ka kung unsa’y buhaton ug kung unsa’y dili buhaton. Kinahanglan gayud nga Siya lang ang imong sundon. Karon, kung madumduman ninyo ang panan-awon nga gihatag Niya sa ako mahitungod niadtong mga isda, kabalo na mo, ug kung unsa nga dili mo pueding itudlo ang supernatural nga mga ilhanan ngadto sa mga masuso nga Pentecostal. Nadumduman ninyo. Ug mao gyud. Ug anaa na ako sa pultahan mismo niining bag-ong Mensahe.

161 Niadtong mihawa na kanako ang maong panan-awon, ingon ko, “Amen, Ginoo!” Ug ang akong asawa nga nagatindog didto, halos makuyapan. Ug mibangon ako kalit gikan sa higdaanan, makasulti na ako nga ingon na ka maayo sama sa naandan kong sinultihan. Diha sa usa lang ka segundo, wala na gyud ko’y bisan gamay’ng hilanat.

162 Gitawgan ko si Doc Schoen, ingon ko, “Gusto ko unta nga masusi mo ako.”

Ingon niya, “Unsa?”

163 Ug ako mismo ang miadto didto, ug gisusi niya ako’g maayo, gisusi ang mga sinus, ang ingon, “Sultihi ko kung unsa’y nahitabo, Igsoong Branham.”

Ug ingon ko, “Toohan mo ba ang akong istorya?”

Ingon niya, “Unsaon pa nako sa pagduhaduha niini? Nahitabo na mismo.”

¹⁶⁴ Ingon gyud niana, kita n'yo. Ingon gyud niana, higala. Kabalo mismo ang Dios kung unsaon ka Niya tipigan pag anaa ka sa usa ka tapok sa abo. Kabalo Siya kung unsaon pagbuhat ang usa ka butang para kaninyo hangtud nga mahatud Niya ang Mensahe sa inyo, nakita n'yo, mobuhat gyud og usa ka butang.

¹⁶⁵ Karon, wala ko kabalo kung unsa na ka daghang pagkapildi. Nag-adto ako dili pa lang dugay, naminaw sa usa ka sibya diha sa radyo. Ug dihay usa ka ministro nga nagwali mahitungod sa pagkabanhaw, nga gikan sa Unang Mga Taga-Corinto 15. Ug ginawali niya ang pagkabanhaw. Ug mihunong siya mismo tunga-tunga sa iyang pagwali, ug ingon niya, “Kabalo mo, daghan kaayong mga tawo ang nahadlok sa pagkapildi.” Ingon niya, “Niadtong napatyan si Heneral Patton og usa ka pundok sa mga sundalo,” ang ingon, “dayon gibalita nila kaniya. . . Nagpasugo siya ug nga gusto niya og dugang pa nga mga sundalo, ug gipadalhan nila siya og dugang. Napatay ang mga niini, ug mihangyo siya og mga dugang pa. Ug sa dihang atua na didto ang ikatulong pundok,” ingon niya, “sa higayon man gud nga mopaka-paka na ang mga bala, mangalagiw sila ngadto ilalum sa usa ka silungan, o magdinaganay ilalum sa kung unsa pang katagoan, nga nangahadlok.”

¹⁶⁶ Ingon niya, “Padalhi ninyo ako og mga kalalaken-an, dili mga bata.” Ingon niya, “Ang gikinahanglan ko'y mga kalalaken-an nga andam mamatay. Wala ko magkinahanglan og kinsa man nga nahadlok mamatay. Kung ang katuyoan kon nganong nagapakigbisog kita dili takus pakamatyan, kung ingon-ana ayaw sila ipadala kanako. Ang gikinahanglan ko'y mga kalalaken-an.”

Ang ingon niya, “Pero napildi ka na duha o tulo ka pagpakig-away.”

¹⁶⁷ Ingon niya, “Wala pa ako napildi sa gubat. Napildi lang ako sa usa ka pagpakig-away.” May daw sa Unsa nga nagsulti sulod sa akong kasingkasing.

¹⁶⁸ Nahinumdom ako sa giingon ni Eisenhower, “Sa dihang magkarga ako og bala, magmando pud kanila nga kargahan nila og bala ang ilang pusil, kabliton nila ug dili kadto mobuto, dili gyud molampos,” ingon pa, “dili ko moundang ug nga basta na lang mosurender. gikasa ko para mogawas ang bala ug nagbutang og usa pa, gikablit kini. Kung dili kini mobuto, butangan na pud nako og usa, hangtud nga mobuto ang usa.”

¹⁶⁹ Sa ingon nianang paagi nga angay kining buhaton. Wala lang ako kabalo kung sa unsang paagi kini mahitabo. Pero ang Dios ang akong Maghuhukom sa ibabaw niining pulpito, wala ko kabalo kung unsa na ka daghang pagkapakyas ug unsa pa ka daghang—unsa pa ka daghang pagpakig-away nga mapildi ako, pero dili gayud ako mapildi sa gubat. Giingon Niya sa ako nga ubanan Niya ako. Mobarug ako hangtud nga makita

ko nga gipamatud-an na ang ministerio ug makita kini nga nagapamuhat na. Pagasugdan ko kini karong buntaga, pinaagi sa grasya sa Dios. Wala ko kabalo kung mamuhat ba kini dinhi, kung sa uban nga lugar kini mamuhat, kung sa unsang paagi kini mamuhat o kung unsa'y mamahitabo. Pero moanha ako mismo dinha sa mga linya sa pagpaaampo, nga mag-ampo para sa mga masakiton, hangtud nga mahibaloan ko kung unsa na ang nagakahitabo. Nakita ko na kining nahitabo duha o tulo na ka higayon.

170 Nakita ko na kining nahitabo didto sa balay ni Hattie. Pila na ang nakadungog sa istorya mahitungod sa mga squirrel, ug mahitungod niadtong babaye, sa gamay'ng babaye? Ang pinakaunang tawo mismo nga atong nahibaloan, sukad niadtong panahon sa mga tinun-an, nga sukad nahatagan og pribilihiyong isulti, "Mangayo ka og bisan unsa nga gusto mo," niadtong didto ka. Nadungog n'yo na ba ang maong istorya? Nakita n'yo na ba ang maong babaye? Pila ang wala pa nakakita kaniya, ug nangandoy, gustong makita ang babaye nga nahitaboan niini? Atong . . .

Hattie, mahimo ka bang motindog? Atua ra ang mismong gining.

171 Atua ako kaniadto sa iyang balay. Human nga nasaksihan ko kadtong walo ka squirrel, nga wala gyu'y squirrel og bisan asa niadtong lugara, ug, gilitok ko lang ang pulong, ug atua sila mismo nga mitungha. Tinuod kana. Nga, nanungha sila mismo. Ug ang ingon ko, "Unsa may nakapahimo para motungha ang mga squirrel didto?" ako nga naglingkod didto sa lingkuranan sa iyang kan-anan. Ug ang iyang mama, si Igsoong babayeng Wright, si Igsoong lalaking Wright nga ania karon, atua usab didto nga nagalingkod. Pila man ang atua didto niadtong kan-anan, nga ania karong buntaga? Ipataas ang inyong mga kamot. Bueno, atua ra sila, palibot mismo sa tibuok bilding. Kita n'yo? Bueno, atua sila didto kaniadto. Ug ingon ko, "Sa umalabot nga adlaw . . ." Nagalingkod pud didto ang makalolooy'ng bakol nilang igsoong babaye.

172 Ingon ko, "Kinahanglan nga moabot kini pinaagi sa pananawon, og uban pa, pero sa umalabot nga adlaw moabot kini sa lahi nang paagi." Nagapakig-estorya ako nga ingon niana. Sa kalit lang, gidihogan ako sa kung Unsa (kining mga tawo ang saksi mismo), wala pa ako sukad mingbati og ingon niadto nga pagdihog. Ngano man? Tungod nga gisulti ni Hattie ang hustong butang.

173 Ingon ko, "Asa kaha gikan kadtong mga squirrel? Wala man ni usa ka squirrel didto, ni bisan usa ka lugar man lang para sa ila, pareho lang niadtong poste sa telepono didto. Ug nakita ko nga nahitabo kadto sa walo ka sunodsunod nga higayon." Ug ang ingon ko, "Wala ako kabalo kung asa kadto naggikan."

Ingon ko, “Ang bugtong butang nga nahibaloan ko, gisulayan sa Dios kaniadto nga kumpirmahon ang usa ka Mensahe kang Abraham usa niadto ka higayon, ug gipatungha Niya pinaagi sa paglitok ang usa ka lakeng-karnero, tungod nga nagkinahanglan Siya og usa ka lakeng-karnero, aron kumpirmahon Kini. Tungod siguro kadto nga nagkinahanglan ako og squirrel, para litokon ko pud ang sa ako. Ug gibuhat Niya kadto sa walo ka sunodsunod nga higayon, o pito ka sunodsunod nga higayon, diay, pito ka sunodsunod nga higayon.” Ug ang ingon ko . . .

¹⁷⁴ Ug, si Hattie, siguro wala kabalo kung unsa’y gisulti niya. Tan-awa ninyo kung giunsa Niini paglaktaw sa mga adunahan ug mga mapahitas-on. Tan-awa ninyo kung unsa nga gilaktawan Niini ang tanantanan, ug miadto sa usa ka yanong kabus nga taga-bukid didto.

¹⁷⁵ Ug duna ko’y baynte ka dolyares niadto sulod sa akong bulsa, nga para unta itunol balik sa maong babaye, nga, nagsaad man gud siya og singkwenta ka dolyares para niining bag-ong simbahan nga pagatukoron. Ug wala ko ginasulti kini para pakaulawan siya; wala man gyud siya’y kasarang nga nagsaad og singkwenta sentimos, sa tinuod lang, para iamot kini. Pero, ang kasingkasing niya sa Mensahe, mao nga nagtinguha siya nga makahatag. Si Igsoong Neville, sa akong nahibaloan, gidawat niya kadto, og dili na unta niya dawaton ang dugang pa niadto, pero gipasagdan na lang siya nga maghatag og baynte ka dolyares para niadto. Ug duna ko niadto og duha ka tignapuloka-dolyares nga papel sulod sa akong bulsa, nga gihatag sa ako ni Meda para ipamalit sa mga kinahanglanon sa balay, ug ingon ko, “Ibalik nako kini sa iya karon.”

¹⁷⁶ Dayon nahunahuna ko, Dunay nagsulti kanako, miingon, “Nakita baya kadto ni Jesus ang babayeng-balo nga naghulog og tulo ka sentimos, ug wala baya gyud Niya giuli kadto sa iya.” Gipasagdan lamang Niya siya nga magpadayon sa paghatag tungod nga aduna Siya’y giandam nga mas daku pa sa umalabot.

¹⁷⁷ Wala ako’y hinanawan nga nagapakigsulti na diay Siya kanako sa ingon niadto nga pamaagi, mahitungod sa usa ka babayeng balo, nga mipanaw na ang bana. Gipatay ang iyang bana. Ni wala pud ko’y hinanawan nga Siya ra gihapon diay kadto, sa dihang ingon ko, “Kung ingon niana man itago ko na lang ang baynte ka dolyares, duna man diay Ka uban nga giandam para kaniya.”

¹⁷⁸ Ingon ko, “Ang butang lang nga nahibaloan ko, nga si Jehovah ang mao ra gihapon nga Jehova-Jireh. Makahimo Siya nga magtagana og usa ka halad.”

¹⁷⁹ Ug si Hattie, nga wala’y hinanawan sa kung unsa’y iyang ginasulti, mitindog ug miingon, “Kana wala na’y lain kondili ang kamatuoran mismo, Igsoong Branham.” Oh, grabe! Mao kadto

ang husto mismong butang para isulti. Mao kadto ang husto mismong butang para isulti.

¹⁸⁰ Niadtong higayona mismo, mikunsad ang Gahum sa Dios niadtong lugara; sa pagkatinuod wala pa ako sukad mobati og ingon niadto nga dihog. Sa dihang miabot Kini, ang ingon ko, “Hattie, MAO KINI ANG GINAINGON SA GINOO, mangayo ka og bisan unsa nga gusto mo! Dili ko igsapayan kung unsa man kini, gihatagan ako og awtoridad sa Dios para ihatag sa imo ang tinguha sa imong kasingkasing karon mismo. Kung mangayo ka og usa ka milyon nga dolyar, madawat mo msimo kini. Kung pangayoon mo alang nianang makalooloy’ng bakol nga babaye para siya makatindog ug makalakaw, madawat niya kini. Mangayo ka og bisan unsa pa man nga butang.”

Ingon niya, “Unsa ma’y pangayoon ko, Igsoong Branham?”

¹⁸¹ Ingon ko, “Bisan unsa nga gusto mo. MAO KINI ANG GINAINGON SA GINOO.” Oh, daw unsang pagbati!

¹⁸² Mitan-aw siya sa palibot. Atua didto naglingkod ang ubanong-buhok niyang papa nga namatay na unta kaniadto, halos. Atua pud didto naglingkod ang iyang tigulang nga inahan, nagmasakiton pud. Atua pud didto ang iyang makalooloy, bakol nga igsoong babaye.

¹⁸³ Pero gipili niya mismo kung unsa ang husto. Duna siya’y duha ka tin-edyer nga mga batang lalaki nga anaa sa edad nga pagkabarumbado. Ang iyang minahal nga bana mipanaw na ngadto sa Kahimayaan; si Hattie usa gayud ka Cristohanon, nagpaabot. Pero kadtong mga anak niyang tin-edyer dili pa mga Cristohanon. Ingon niya, “Ang mga kalag mismo sa duha kong anak.” Panalanginan sa Dios ang iyang kasingkasing.

¹⁸⁴ Ingon ko, “MAO KINI ANG GINAINGON SA GINOO, madawat mo sila.”

¹⁸⁵ Ug ania na sila, nga nabautismohan na sa Pagtoo. Gisulti nila kanako niadtong miagi lang nga gabii, bisan, ang mismong gamay’ng batan-ong lalaki nagapakighinugasay na sa mga tiil didto, nga ginapandong ang iyang mga kamot sa ulo ni Igsoong Neville, ug nagaampo para kaniya sa dihang nagahugas siya sa mga tiil.

¹⁸⁶ Nagalingkod tingali dinhi sa panagtigum ang maong duha ka gagmay’ng mga batan-on sa kung asang lugar karong buntaga. Sila ba, Hattie, ania ba sila kauban mo? [Nagaingon si Igsoong Hattie, “Atua sila sa luyo.”—Ed.] Sa luyo, diha kono sa luyo. Asa man kamo, dong? Ipataas ang inyong mga kamot. Asa man ang duha ka batan-on? Atua ra sila, nanagtindog sa pinakaluyo. Panalanginan kamo sa Dios. Sige. Anaa ra sila.

¹⁸⁷ Karon, unsa ma’y nahitabo? Kanang mao ra nga butang, bisan unsa pa, mahimo man unta niyang...bisan unsa pa’y

iyang gipangayo, madawat gyud niya sa gihapon. Maangkon gyud niya sa gihapon.

¹⁸⁸ Karon gitinguha kong makita nga mahinabo kana. Nagadepende lang kini kung unsa ang mamahimong reaksyon sa mga tawo ngadto sa Mensahe. Nakita n'yo kung giunsa niya pagsulti niadto? Gisulti niya mismo ang hustong butang. Sa inyo kining ginasulti, nga maoy nagapahinabo niini. Kung unsa ang ginasulti mo mismo!

¹⁸⁹ Tan-awa kadtong babayeng Sirofenicia sa dihang miduol siya kang Jesus. Ingon niya, "Ginoo, ang akong anak nga babaye ginasakit pag-ayo sa usa ka yawa. Ikaw nga Anak ni David, ari Ka og ayoha siya."

¹⁹⁰ Ingon Niya, "Dili matarung para Kanako nga pagakuhaon ang tinapay sa mga anak ug igasalibay sa inyo nga mga iro."

¹⁹¹ Whew! Unsa kaha kung gisulti Niya Niya kana sa pipila kanato? Manag-ingon gyud kita siguro, "Tawgon ako nga usa ka iro? Huh, wala gyud ko og pulos para Kaniya, diay! Husto gyud diay ang gisulti niining dakung simbahan. Siya walay lain kondili usa ra ka holy-roller. Siya walay lain kondili usa ka Beelzebub mismo." Mamahimong ingon niana gyud siguro ang reaksyon nato. Pero ang babaye dili gyud ingon niana.

¹⁹² Ingon niya, "Tinuod man, Ginoo. Eksakto gyud Ka. Pero andam man ang mga iro nga kaonon ang mga mumhong nangahulog ilalum sa lamesa sa mga anak."

¹⁹³ Mi-epekto kadto Kaniya. Ingon Niya, "Tungod nianang mga pulonga, mibiya na ang yawa sa imong anak nga babaye. Tungod nianang mga pulonga!"

¹⁹⁴ Nakadepende kini sa inyong reaksyon, mga higala. Dili ba miingon man Siya niini? Kinahanglan ninyo nga toohan kini, mga higala. Kamo, ayaw ninyo ako toohi, usa lamang ako ka tawo; pero toohi ninyo kung unsa ang ginasulti ko sa inyo, toohi ninyo ang Mensahe. Kung ayaw ninyo toohan ang mensahero, toohi ang Mensahe. Kung mosulod ang usa ka tawo diha sa lawak, nga may dalang telegrama, bisan kinsa pa siya, unsa pa man ang hitsura sa maong tawo o kung kinsa man siya, daku man o gamay, toohan man ninyo kung unsa ang anaa sa telegrama, dili ang tawo. Gipadala ako sa Dios para isulti sa inyo. Aduna ko'y dalang usa ka Mensahe. Gipadala ako sa Dios para isulti sa inyo nga nabanhaw Siya gikan sa mga patay, nga ania Siya karong buntaga. Gipamatud-an Niya kini pinaagi sa mga ilhanan ug mga katingalahan, nga ania gayud Siya, ug ang matag usa kaninyo mamaayo sa inyong mga sakit kung moduol lamang kamo nga dunay hustong reaksyon. Mahimo n'yo bang buhaton kana, samtang awiton nato ang *Only Believe*.

¹⁹⁵ Karon tugotan n'yo kadtong mga igaampo, nga managpanuol dinhi ug maglinya dinhang dapita mismo. Karon,

ayaw pagduol gawas kon nagatoo kamo sa tibuok ninyong kasingkasing.

¹⁹⁶ Minahal nga Ginoo, kini na ang oras. Nagaampo ako nga Imong ayohon kining mga tawo, Ginoo. Ug balaana kining lana. Angkona ang himaya alang sa Imong Kaugalingon, Amahan. Ginapangamuyo namo ang mga niini sa Ngalan ni Jesus Cristo. Amen.

¹⁹⁷ Nahunahuna ko kung mahimo ba natong hangyoon nga kadtong mga tawong nanagtindog sa *niining* kilid nga bahin dinhi, kung dunay paagi siguro nga makakuha sila og bisan gamay lang nga espasyo dinhi, para mapaagi nato diha ang mga tawo, kung mahimo ninyo. Makaagi mismo dinhi, padulong *nianang* dapita. Dayon mahimo silang moagi sa niining dapita, diretso sa linya, para makahimo og usa ka linya paingon nianang dapita.

¹⁹⁸ Siguradong aduna gyu'y mamahitabo, Igsoong Neville. [Nagaingon si Igsoong Neville, "Amen. Nagakahitabo na mismo karon. Dalaygon ang Ginoo! Ania na si Jesus. Oo. Ang matag usa kanila mamaayo na tungod sa Gahum sa Dios."—Ed.] Amen.

¹⁹⁹ (Unsa'y giingon? Dinha mismo...Bueno, dili, paingon mismo ngadto sa pikas. Ako ug si Igsoong Neville, oo, iampo namo sila hangtud didto sa pinaka-ulahi. Busa, dili na ninyo sila puede nga ipabiyo nga paingon niana ang direksyon, kay basin, kung buhaton ninyo, inyong...Kadali lang...?.?)

²⁰⁰ Karon tugoti ninyo nga isulti ko sa mga nanaghulat nga mga ania karon: *Kini* ang Pulong sa Dios, nga Siya'y akong...Nga gikinabuhian ko, ug pakamatyan ko, pinaagi sa grasya ug tabang sa Dios. Ang Dios ingon nga akong balaang Maghuhukom, gisulti nako sa inyo ang Kamatuoran. Nakita ko na, lakip ang tanan niining mga butang nga moabot. Bisan gikan niadtong gamay'ng isda nga gibuhi didtong lugara, nadungog n'yo na ba kana nga istorya? Kanang mga kalalaken-an nga nagalingkod mismo dinha, silang duha, atua mismo sa dihang nahitabo kini; nga gisulti ko daan usa ka adlaw sa wala pa kadto nahitabo. Karon, giunsa man nako paghimo nga nasulti sa inyo kining mga butanga nga nangahitabo? Kita n'yo, gusto kong iwali ang mahitungod sa, usa sa mga niining gabii, ang mahitungod sa *Pangtumbas*. Mahimong magsulti kaninyo ang si kinsa mang tawo mahitungod sa kung unsang butang, ug magsige pa og sulti nga sama niana, pero kung wala'y Kasulatan aron pangtumbas niini, sa kadugayan mahugmo kini. Kung kining pagpang-ila, ug kining mga panan-awon ug kining mga butang nga akong gisulti na kaninyo, kung dili kana ang Kamatuoran; unang butang, aduna ang Biblia para magpaluyo niini, ug anaa ang Balaang Espiritu aron pamatud-an nga ang gisulti ko sa inyo mao'y Kamatuoran.

201 Karon, mga katorse na ka tuig ako nga anaa sa natad sa buluhaton, nga miagi na sa matag kritiko nga maatubang ko. Nga mga Edukado, maalamon, tanan nang uban pa, pero wala gyud nila bisan usa ka higayon nga nahimong. . .

202 Dayon kabalo ba mo kung unsa ang sulti nila? Nadungog n'yo na kini dinhi. Nanagsulti sila, “Aduna kono gyu’y mga tawong nanaglibot-libot sa mga mananambong, gina-istorya-istorya ang mga tawo.” Ang unang sulti nila nga ang mga tawong naglibot-libot gikan kono sa akong iglesia, nga mangadto didto para buhaton kini. Dayon dili man nila kadto mapamatud-an, kay hilabihan man kadaghan kadto.

203 Ang sunod pud nga gisulti nila, nga, “Mahimong ang mga kaigsoonan kono” nga kakuyog ko, “nakapuwesto kono sila didto sa akong likod ug tagasulti, ‘Kini nga tawo may problema sa pandungog, sa iyang mga dalunggan.’”

204 Dayon ang sulti pud nila nga, “Si Billy Paul, si Billy Paul kono moduol ug—ug mosaka didto ug basahon kadtong anaa sa kard, kung unsa’y gisulat sa mga tawo. Kung dunay problema sa ilang mga dalunggan, isulti kono niya dayon, ‘dalunggan ang ilang problema’ o ‘tiyan ang ilang problema.’”

205 Unsa man diay kadtong mga tawo nga anaa dinha nga wala ma’y mga prayer kard? Sa unsa mang paagi diay nga makapanagna kini og mga butang nga nagakahitabo sa eksakto gayud? Giunsa man pagkahitabo nga ingon niana gyud? Dili gyud posibli. Kabalo niana ang si bisan kinsa, nga may hustong panghunahuna.

206 Ingon niana pud ang gisulti nila kaniadto mahitungod kang Jesus, sa dihang miadto si Felipe ug gikuyog si Natanael. “Si Felipe usa ka higala ni Jesus.” Ingon niya, “Sigurado, gisulti na niya daan kang Jesus ang tanan mahitungod kang Natanael. Gusto man gud Niya nga makabig si Natanael.”

207 Ug dayon ingon sa mga tinun-an, o ingon nila nga mga disipulo sa dakung simbahan, “Kining Tawhana si Beelzebub. Siya si Beelzebub. Siya’y usa ka manghihimalad.”

208 Miingon si Jesus, “Pasayloon Ko kamo niana. Apan sa umalabot nga adlaw ang Espiritu Santo moabot para buhaton ang mao gihapong butang, usa lang ka pulong batok Niana dili na gayud mapasaylo.” Karon kung. . .

209 Kaniadto pa akong nagmatinuuron kaninyo nga mga tawo, nga ingon ka matinuuron nga akong nahibaloan nga kamatinuuron. Oh, mahimong gisupak ko ang pipila ka mga pagtulon-an nga aduna kamo sa gamay’ng teolohiya ug mga butang. Pero, ang hinungdan kon nganong ginabuhat ko kana, ang sulti man gud ni Pablo, “Kon usa man ka manolunda nga gikan sa Langit ang moanhi ug magwali og laing uban pa nga gawas sa kung unsa ang ginasulti sa Biblia,” ug kung unsa ang gitudlo na niya, “ipatunglo siya.”

²¹⁰ Busa, kinahanglan kong sundon kung unsa lamang ang gisulti sa Biblia. Kung ang Biblia nagsulti, “Siya mao sa gihapon kagahapon, karon, ug hangtud sa kahangturan,” Nagatoo ako niana. Kung unsa lamang ang gisulti sa Biblia, mao ra gyud kana ang ginatooan ko. Ginasulti ko lang kini nga ingon ra gyud niana. Wala ko’y bisan unsa man nga edukasyon, wala ko’y bisan unsa man nga pagbansay. Naminaw lang ako sa Balaang Espiritu ug sa Biblia. Ug hangtud karon, hangtud niining buntag sa Pasko sa Pagkabanhaw, sulod sa trayntay-uno ka tuig, wala gayud Niya ako sukad pakyasa.

²¹¹ Ug ginasulti ko sa inyo nga gisulti kanako sa Balaang Espiritu ang mahitungod nianang umaabot nga ministerio, nga niining miaging duha o tulo ka tuig, ug gihisgotan ko na sa mga iglesia og bisan asa. Ug ang mismong Dios nga Makagagahum-sa-tanan maoy akong Maghuhukom, nga dinhi mismo niining kilid sa Salem, mitungha kadtong mga squirrel kon diin wala gyu’y squirrel niadtong lugara. Didto mismo nga kuyog si Charlie, nga ania pud karon nagatindog dinha sa luyo, ug daghan pa kanila nga atua didto sa Kentucky; nanungha kadtong mga squirrel didto sa lugar kon diin wala ma’y mga squirrel didto, nga gisulti ko mismo kung asa sila manungha. Didto kon diin atua pud si Tony ug sila, ni Banks, nga naglingkod dinha karon. Ug atua kini mismo, sa eksakto gayud. Pagbalik namo, ug ang unang tawo nga gisultihan niadto, mao kanang babaye nga nagalingkod mismo dinha, ug mao kana. Sa miaging buntag didto, sa dihag nagsakit ako tungod niadtong problema sa tutunlan, nakita ko si Jesus nga nagtindog sa akong atubangan, ug gisulti Niya kanako nga gikumpirma na ang ministerio sa ako.

²¹² Karon unsa man ang magakahitabo, wala ko kabalo. Pero, usa ka butang mismo, kinahanglan kong ipadaplin ang usa, para makatikang ngadto niini. Ang butang lang nga nahibaloan kong buhaton. Pasagdan nang mahibaw-an, pasagdan nang maikulit mismo, sama sa gisulti ni Job kaganinang buntag, pinaagi og puthawn’g panulat, ibabaw sa usa ka bato. Wala ko kabalo kung unsay buhaton. Ang bugtong butang nga nahibaloan ko, mao ang magpadayon lang paabante. Gisulti Niya kadto kanako. Ug ang Dios ang akong Maghuhukom, gisulti Niya kadto kanako. Gisulti ko sa inyo ang Kamatuoran. Ug kung gikumpirma na sa Dios ug gisulti na sa inyo, ug wala ni usa ka higayon nga si bisan kinsa dinhi sukad makatudlo sa ilang kamot sa unsa man nga nasayup, kung ingon niana kini gyu’y husto, sa gihapon. Husto gyud, kini.

²¹³ Karon sa pagnaug ko dinhi ug magtindog sa tumoy niining linya, hangyoon ko ang anciano sa iglesia, si Igsoong Neville dinha, nga diosnon nga tawo, nga pastor nato dinhi, nga dihogan ang mga tawo, Pagapandongan nako sa mga kamot ang mga tawo, tungod kay mao man kana ang gisugo ni Jesus, pagkahuman sa Pasko sa Pagkabanhaw, nga, “Lakaw

pagapandongan ninyo sa mga kamot ang mga masakiton, sila mangaayo.”

214 Wala ko kabalo kung unsay Iyang isulti kanako samtang anaa ako sa linya. Pangingkamutan kong mabati kanang hilabihang pagpangdihog. Wala ko kabalo kung unsay mamahitabo. Wala ko kabalo. Kung unsa man, buhaton ko lang kung unsa ang igasulti Niya kanako.

215 Karon duol kamo ngari, dumuol kamo sa bug-os n’yong kasingkasing. Badlongon man Niya kamo, wala man Siya’y isulti sa inyo, bisan unsa pa man, maglakaw kamo nga nagapasalamat gihapon Kaniya, nakita n’yo. Tungod kay, nabuhat na kini, paagi ra man kini aron maipaabot sa inyo.

216 Karon, igsoon, tungod nianang bitiis, gusto kong toohan mo kini. Kung nabuhat Niya, pinaagi sa tawag sa telepono, nga wagtangon ang sakit mo sa tiyan, Siguradong mahimo Niyang wagtangon kanang problema mo sa bitiis gikan sa imo karong buntaga, kita n’yo. Karon toohan mo sa tibuok mong kasingkasing.

217 Ug kanang gining nga dunay gamay’ng bata nga adunay sakit sa kasingkasing, ayaw na pagduhaduha pa. Toohi! Toohi gayud!

218 Karon gusto nako ang tanan nga ania sa iglesia modangop ngadto sa pag-ampo. Ug manaog ko para mag-ampo. Tanan kamo magpabilin lamang sa pag-ampo karon, samtang isaisahon nako ang linya sa pagpaampo, samtang ako maghangyo, magpandong sa akong mga kamot dinha ug magampo og pagpanalangin.

219 Ug, timan-i, kung aduna man sa inyo ang dunay sala nga wala pa maisugid, ginapahibalo ko kaninyo nga dili gayud kamo pagaayohon sa Dios nga anaa pa kanang sala nga wala pa nahangyoan og kapasayloan. Tul-ira n’yo kini, sa dili ka pa moagi ngari, tungod kay basin unya makapasamot pa hinooon kini sa inyong sakit. Kita n’yo?

220 Karon wala pa kini sa pagpang-ila. Sa pagpang-ila, mahibaloan nako og mahibutyag kini nga mga problema. Pero, ug dili pa kini pagpang-ila, ginapaabot ko ang bag-ong pangministerio. Nakasabot ba gyud ang tanan niini? Sige. Karon toohi ninyo.

Karon mag-ampo kita samtang iduko nato ang atong mga ulo.

221 Amahang Dios, ang tamla-sa-tudlo nako ania gyud sa gihapon sa ibabaw niining pulpito, oras-oras, sulod sa halos traynta na ka tuig o sobra pa, nga ako nagtindog dinhi nga nagwali, ug sa tibuok kalibutan usab. Ug gipamatud-an Mo ang Maayong Balita nga giwali ko, tungod nga naggikan man Kanimong ang maong Mensahe. Wala gyud ako nakaeskwela sa

unsa mang eskwelahan, ni magkonsulta man sa kang bisan kinsa gawas Kanimo, ginabasa lang ang Imong Pulong ug nagapaabot para makita kung unsa ang isulti sa Espiritu nga buhaton ko.

²²² Ug karon, Ginoo, nasayod Ka mahitungod niining ministerio sa Marcos 11:23, ug kabalo ko nga ang maong takna haduol na, kabalo Ka nga tinuod ang gisulti ko mahitungod niadtong mga squirrel, ug mahitungod kang Igsoong babayeng Hattie ug sa iyang mga anak nga lalaki. Karon, Amahan, ug kabalo ko nga panan-awon kadtong miabot kanako didto sa higdanan, sa miaging buntag. Nakita ko kadtong Biblia, ug dayon ang krus, ug dayon Ikaw mismo. Ug gipadayag sa akong hunahuna nga kinahanglan kong dawaton kini, tungod kay nakumpirma na kini.

²²³ Karon, Ginoo, moabante ako karong buntaga sa akong iglesia, para motindog dinhi niining buntaga sa Pasko sa Pagkabanhaw, nagaampo nga Imo akong ipataas ngadto sa usa ka bag-ong gasa, nga mas gamhanan, alang sa mga tawo, nga mas gamhanan. Dili aron maluwas ako; tungod kay giluwat Mo na man ako, Ginoo, kaniadto pa. Dili para sa akong kaugalingon; gisalikway ko na ang tanang dagkung mga butang, para maila Ka. Sama sa gisulti Mo kanako didto niadtong dakung templo, sa miaging adlaw, “Ako mao ang imong bahin.” Karon, Ginoo, himoa ako nga Imong bahin, aron makakaplag ako og kahimutanan diha Kanimo, nga mosulod kanako ang Imong Espiritu. Ug sa dihang pandongan ko sa akong mga kamot kining bililhong, nanag-antus nga mga tawo, hinaut nga ang Imong Espiritu, Ginoo, ang mobuhat sa uban pa nga buhaton. Mao lamang kana ang akong nahibaloan nga pagabuhaton, Ginoo.

²²⁴ Nahinumdom ako sa mao sugo kanako, nga ako “natawo aron mag-ampo alang sa mga tawong may sakit, nga mapatoo mo sila, ug magmatinuuron lang sa dihang magaampo ka.” Ginoo, ako’y . . . wala ko kabalo kung unsaon pa nga mamahimong mas sinsero. Akong—akong . . . Nanag-antus sila, Ginoo. Ug ako—nag-antus pud ako, mismo. Mahimo ba, Minahal nga Dios, itugot nga mamaayo sila, ang matag usa kanila.

²²⁵ Mopadayon ako karon, Ginoo, pinaagi sa pagtoo, sama ni Moises kaniadto nga milakaw latas ngadto sa Dagat nga Mapula. Motikang na ako gikan niining sagradong pulpito, paingon niining linya sa pagpaampo, sa Ngalan ni Jesus Cristo. Hinaut nga ang Dios Nga naghatag kanako niadtong mga squirrel, ang Dios Nga naghatag kang Igsoong babayeng Hattie niadtong mga pulong, ang Dios Nga nagpasulti kanako niadtong mga butanga, hinaut nga ubanan Niya ako. Moadto ako sa Ngalan ni Jesus Cristo. [Ginabiyaan ni Igsoong Branham ang mikropono aron mag-ampo alang sa mga may sakit, ang uban sa iyang mga ginasulti dili maklaro—Ed.]

226 Satanas, ginakondena ko ang... ikaw, sa Ngalan ni Jesus Cristo, nga biyaan mo ang bata. Biyaan mo kini, gumula ka niining bata; lumayas ka, ug ang bata mamaayo na.

227 Ginapandongan ko ang akong igsoong lalaki, sa Ngalan ni Jesus Cristo, ug gihinginlan ko ang balatian sa iyang lawas. Amen.

Sa Ngalan ni Jesus Cristo, ihatag sa igsoong babaye ang iyang hangyo.

228 Ginoo, sa Ngalan ni Jesus Cristo, ihatag kang Igsoong babayeng Ruth ang iyang pagkaayo. Amen.

229 Nagaampo ako alang sa bata. Pero ako—manaug ako gikan niining pulpito... Asa gani ka nagpuyo? [Nagaingon ang Igsoong babaye, “Bloomington.”—Ed.] Bloomington, sa Indiana ba? Magsulat ka sa ako mahitungod niining bata. Nanghubag gyud ang tiyan niya karon. Motoo ka ba, gining, nga kini’y husto? [“Ginatooan nako nga kini’y husto.”]

230 Kung ingon niana, Amahan, ginapandongan nako sa akong mga kamot ang... kining bata, ug ginahinginlan kining yawa. Pahawa gikan sa bata. Ug hinaut nga ang...?... Hinaut nga mamahimo na kining normal karon ug ang bata mamaayo na.

Magsulat ka sa ako, pagkahuman sa pipila ka adlaw.

231 Nakita n’yo ba kanang bata nga libat nga naghigda dinha? Kung dili ka na magduhaduha pa, dad-on mo pauli *kanang* bata ug maipakita mo kini nga normal ug maayo na.

232 Ginapandongan nako sa mga kamot kining igsoong babaye. Ug hinaut nga magkaaduna siya’y kinaiya og buhat sama niadtong babayeng Sirofenicia. Ug mamaayo na unta siya sa Ngalan ni Jesus Cristo...?...

Himoa nga ang kasingkasing mamaayo na, sa Ngalan ni Jesus Cristo.

233 Ginasulti ko kining mga pulong. Siguradong mamaayo na kini. Dili kini puedeng mahimong unsa pa man. Gisulti ni Jesus, “Mahimo Ko, kung motoo ka.” Karon, kung mahimo Niya nga ipatungha ang usa ka squirrel nga ingon *niana*, sama sa gibuhat Niya niadtong lakeng karnero usa niadto ka higayon, Mahimo pud Niya nga ipa-normal kanang kasingkasing ug mamaayo na. Sigurado gyud kini.

Sa Ngalan ni Jesus Cristo, mamaayo na kanang kasingkasing. Itugot kini.

234 Karon, dili ba ingon niana ka yano ra? Yano ra kini. Ingon niana ka kasimple ang Dios, nga ginalagpas-lagpasan lang nato kini. Karon magpabilin ka lang aga simpli nga dili mo na hunahunaon ang mahitungod niana. Mamahimo na kining okey.

235 Ginoo, himoa nga mamaayo ang among igsoong babaye, sa Ngalan ni Jesus Cristo. Amen. Igsoon...?...

236 Ginoo, gisulti ko na kining mga pulong, sa pagkamatinuuron nga paagi nga mahimo kong isulti atubangan sa mga tawo. Gisulti ko kanila, “Kung magsulti ka niining bukid, ‘Pahawa ka,’ ug dili magduhaduha, maangkon mo kung unsa ang gisulti mo.” Sa Ngalan ni Jesus Cristo, hinaut nga kining balatian mawagtang, ug lakip ang tanang mga problema nga aduna ka. Ayaw na pagduhaduha. Dumuol ka mismo sa Iya karon.

237 Ginoo, ginapandongan nako sa akong mga kamot kining gamay’ng binuhat karon nga dunay grabeng sakit sa ulo. Sa Ngalan ni Jesus Cristo, hinaut nga mamaayo na kini. Amen.

238 Ginoo, sa Ngalan ni Jesus Cristo, himoa nga mapahawa kanang bukid gikan kaniya, og hinaut nga mamaayo na kini. Hinaut nga ang among igsoon mamaayo na . . .? . . . Amen.

239 Bungol ug amang; bungol nga di-makasulti. Ginoo, sa Ngalan ni Jesus Cristo! Nagbarug ako ug nagwali adlaw-adlaw, ug tuig-tuig, wala pa ako sukad nakakita og pagtoo nga nakakonektar sa Imo, sa tibuok kong kinabuhi, nga wala gyu’y butang nga nahitabo! Karon, siya’y bungol sa iyang dalunggan, ug dunay mibusdik sa iyang tiyan. Himoa nga mamaayo siya, sa Ngalan ni Jesus Cristo. Amen.

Karon, ayaw gyud pagduhaduha.

240 Ginoo, nasayod Ka sa balatian sa iyang lawas. Samtang ginapandongan ko siya sa mga kamot, inubanan og sinserong kasingkasing, himoa nga siya mamaayo, sa Ngalan ni Jesus Cristo. Amen.

241 Ang kamatayon anaa na diha sa usa ka pultahan, ang pagtoo anaa pud dinha sa sunod. Dios, ipaligid ang bato ug himoa nga ang pagtoo mao’y mopuli. Hinaut nga ang kanser mobiya na sa babaye, sa Ngalan ni Jesus Cristo.

242 Ginoo, hinaut nga siya mamaayo na. Ginapandongan ko siya sa akong mga kamot. Nagalanog pa sa gihapon ang Mensahe sa mga bungbong. Sa Ngalan ni Jesus Cristo, hinaut nga siya maayo na.

243 Amahang Dios, ginapandongan nako sa mga kamot ang akong igsoon. Itugot kini, Ginoo, nga ang Imong Espiritu ug gahum, mahatag sa iya ang iyang hangyo. Itugot kini, sa Ngalan ni Jesus Cristo. Amen.

Tapos na kini. Ayaw na pagduhaduha.

244 Ginoo, ang tinguha sa among igsoon mao ang pagduol sa Imong Presensiya, tungod niining kondisyon nga anaa kaniya. Karon, sa Ngalan ni Jesus Cristo, tugoti siya nga maangkon niya ang butang nga gipangamuyo niya. Amen.

245 Pagkamahinungdanon gayud nga butang! Himoa nga ang Espiritu Santo mokunsad sa niining bata, alang sa kahimayaan sa Dios para ilang madala siya didto sa iyang . . .? . . . Alang sa Gingharian sa Dios, hinaut nga madawat niya kini. Amen.

246 Amahan, sa Ngalan ni Jesus Cristo, mamahimong ingon niini gyud kini, nga mamaayo na ang among igsoong babaye, ug itugot ang iyang hangyo, sa Ngalan ni Jesus. Amen.

247 Hinaut nga itugot kini. Imong madawat ang Espiritu Santo. Walay ubang paagi nga mababagan ka gikan sa . . . ? . . . Kinahanglan mo gayud! Kinahanglan imo gyud madawat Kini, tungod kay gisulti na kini sa Dios. Magpabilin ka nga matinud-anon Niini.

Paningskamotan mo lamang nga makagawas nianang gamay'ng babag dinha. Isulti lamang . . . ? . . .

248 Langitnong Amahan, sa Ngalan ni Jesus Cristo, itugot ang hangyo sa among igsoong babaye. Amen.

249 Amahan, sa Ngalan ni Jesus Cristo, itugot ang hangyo sa among igsoong babaye. Mamaayo na unta siya. Amen.

250 Makahimo Siyang magpatungha og squirrel, sa pito ka sunod-sunod nga higayon. Iyang ihatag nianang babaye ang unsa mang gihangyo niya; ihatag usab Niya kini sa imo . . . ? . . .

251 Ginoo, sa Ngalan ni Jesus Cristo, itugot ang hangyo sa among igsoong babaye. Kini'y Imong Pulong. Salamat. Ug itugot kini unta ngadto sa babaye, Amahan, pinaagi ni Jesus Cristo. Amen.

252 Imo bang mga minahal sa kinabuhi? Amahan, sa Ngalan ni Jesus Cristo, itugot ang mga niini . . . ? . . .

253 Ginoo, kining gamay'ng babayeng Judio . . . Ikaw ang Dios ni Abraham. Itugot kini, sa Ngalan ni Jesus Cristo, ang iyang hangyo. Mamatuman gyud kini!

254 Sa Ngalan ni Jesus Cristo, Dios sa Langit, itugot ang iyang hangyo. Amen.

255 Kining gamay'ng batang babaye. Samtang nagasaka ka sa entablado dinha, gisulti na kanako sa Dios ang mahitungod sa imong kinabuhi. Wagtanganon na Niya kanang pagkanerbiyos gikan sa imo.

256 Ginoo, ginahinginlan nako ang pagkanerbiyos niining babaye. Hinaut nga mobiya na kini kaniya niining orasa ug mogawas siya dinhi nga malipayon na. Mamahitabo gyud kini, sa Ngalan ni Jesus Cristo.

257 Dios sa Langit, Nga nagbanhaw sa Imong Anak, nga si Jesus, sa pagkabanhaw nga among ginasaug, hinaut nga saulogon niya kini nga labaw pa sa karong adlaw . . . ? . . . Sa Ngalan ni Jesus. Amen.

258 Sa Ngalan ni Jesus Cristo, nga Anak sa Dios, ginapandongan nako og mga kamot ang akong igsoong babaye, nangamuyo nga siya'y mamaayo na karon sa Ngalan ni Jesus.

259 Sa Ngalan ni Ginoong Jesus Cristo, nga Anak sa Dios, hinaut nga mamaayo na ang among igsoong babaye. Amen. Dili na siya

niini mapugngan pa. Kinahanglan niini nga mobiya na. Lumayas ka, kinahanglan nga mohawa na kini.

²⁶⁰ Ginoo, sa Ngalan ni Jesus Cristo, hinaut nga mamaayo ang among igsoong babaye. Amen. Sa Ngalan ni Jesus Cristo, giayo nako, ang akong igsoong babaye. Amen.

Sa Ngalan ni Jesus Cristo, giayo nako ang akong igsoong babaye. Amen.

Sa Ngalan ni Jesus Cristo, giayo nako ang akong igsoong babaye.

Sa Ngalan ni Jesus Cristo, giayo nako, ang akong igsoong babaye.

Sa Ngalan ni Jesus Cristo, ginahatag nako sa babaye ang iyang hangyo. Amen.

²⁶¹ Ginoo, sa Ngalan ni Jesus Cristo, ginahatag nako niining gamay'ng inahan ang iyang hangyo.

Sa Ngalan ni Jesus Cristo, ginahatag nako sa babaye ang iyang hangyo, Ginoo.

Ginoo, sa Ngalan ni Jesus Cristo, ginahatag nako sa babaye ang iyang hangyo.

²⁶² Satanas, ginapalayas ta ka. Sa Ngalan ni Jesus Cristo, lumayas ka sa babaye.

²⁶³ Dugay ka nang nagapos. Gawasnon ka na karon. Mamaayo ka na. Mamahimong okey na kini karon, kung ingon niana. Toohi kini karon.

²⁶⁴ Dios, sa Ngalan ni Jesus Cristo, ginahatag nako niining igsoong babaye, nga bakol, ang iyang pagkaayo. Amen.

²⁶⁵ Sa Ngalan ni Jesus Cristo, ginahatag nako niining igsoong babaye ang iyang pagkaayo. Amen.

²⁶⁶ Sa Ngalan ni Jesus Cristo, igsoong babaye, ginahatag nako sa imo ang imong pagkaayo. Amen. Mamatuman kini!

²⁶⁷ Nagasalig ako sa Dios nga dili ako nagakasayup. Itugot kini, pinaagi sa pagtoo. Mamatuman kini!

²⁶⁸ Nagatoo ka ba nga ginahatag sa imo sa Dios ang kusog aron ayohon usab ang sakit sa kasingkasing? Nagatoo ka ba sa istorya nga bag-ohay ko lang gisulti? Sa tibuok mong kasingkasing? Nan ginahatag ko kanimo ang imong pagkaayo. Sa Ngalan ni Jesus Cristo, ginahatag nako sa imo ang imong pagkaayo.

²⁶⁹ Unsa gani ang ngalan niining babaye nga bag-ohay lang mianhi dinhi? Nagpuyo ka ba sa palibot lang dinhi sa kung asa man? [Nagaingon ang igsoong babaye, "Oo."—Ed.] Timani nga giayo ka na! Ingon niana gyud kana ka tinuod sama nga nagatindog ako dinhi.

²⁷⁰ Amahan, sa Ngalan ni Jesus Cristo, itugot kini, nangamuyo ako, sa iyang pagkaayo. Amen.

271 Amahan, sa Ngalan ni Jesus Cristo, hinaut nga maangkon sa babaye ang iyang pagkaayo. Amen!

272 Akong—akong—akong ginapahayag nga ikaw... Akong—akong—akong... Tungod sa grasya sa Dios, pinaagi sa Langitnong gasa, ginahatag nako sa imo ang imong pagkaayo! Gipalayas na ang yawa, usab.

273 Nagatoo ka ba Igsoong babayeng Rose? Oh Ginoo, Magbubuhat sa mga langit ug yuta, ihatag niining Igsoong babayeng Rose Austin ang iyang pagkaayo, Ginoo, sa Ngalan ni Jesus Cristo. Amen. Mao na kana, Igsoong Rose, lakaw ka nga nagatoo na.

274 Ginoo, ihatag sa among igsoong babaye ang iyang pagkaayo, sa Ngalan ni Jesus Cristo. Amen...?...

275 Nagatoo ka ba niana? Nagatoo ka sa matag tipik niini. Kung ingon-ana ginahatag nako sa imo, sa Ngalan ni Jesus, ang imong hangyo. Ayohon siya sa Dios.

276 Hinaut nga mamahimong ingon niana kini, Ginoo, nga ang igsoon sa babaye mamaayo na, sa pisikal ug espirituwal, sa Ngalan ni Jesus Cristo. Amen!

Hinaut nga kini na ang takna sa dihang...?...

277 Ginoo, ginapandongan nako og mga kamot ang babaye, ingon nga siya'y hingpit nga wala na'y paglaum, sa mga doktor o unsa mang tambal gikan sa medikal nga siyensiya. Pero dili ingon niana pagmatagbo niya ang nabanhaw nga Cristo. Sa Ngalan ni Jesus, mamaayo na unta ang babaye. Amen.

...?...

278 Ginoo, ihatag sa among igsoong babaye, samtang gipaminawan ko'g ayo ang iyang hangyo, nga ginabantayan ang matag pulong nga gisulti niya. Kini'y alang sa Gingharian. Nangamuyo ako nga itugot Mo kini ngadto kaniya, sa Ngalan ni Jesus. Amen.

[Nagapakigsulti ang igsoong babaye kang Igsoong Branham—Ed.]...?...

279 Ginoo, ingon nga Imong alagad, sa pagpaminaw ko sa pagtuaw nianang inahan para sa iyang masuso, ginahinginlan ko ang yawa nga nagbuhat niini.

280 Ug tungod sa pagpahayag sa babaye sa iyang pagtoo, ginapalayas nako kining yawa. Dili mo mahimong paralisahon kining bata. Mamaayo ka na sa Ngalan ni Jesus. Amen.

Naayo na ang bata, igsoong babaye. Ayaw na pagduhaduha pa, ni bisan gamay. Panalanginan ka sa Dios, igsoon. Imo ba kanang anak? Hinaut nga madawat niya ang Espiritu Santo!

281 Puede mo bang dad-on ang bata sa usa ka lugar ug paminawon mo siya sa pipila lang ka minuto. Nagatoo ko nga

duna gyu'y nahitabo sa bata. Madawat mo kini. Nagatoo ka ba niana?

²⁸² Sa Ngalan ni Jesus Cristo madawat unta sa among igsoong lalaki ang iyang pagkaayo.

²⁸³ Ginoo, hinaut nga kondenahon sa Gahum sa Makagagahum nga Dios ang balatian nga anaa sa iyang lawas, ug pun-on siya sa Espiritu Santo. Kini na ang oras ug ang panahon. Sa Ngalan ni Jesus Cristo, ginahatag nako Kini kaniya. Amen.

²⁸⁴ Wala na ang asukal. Nadawat mo na ang Espiritu Santo. Unsa ka dugay ka na bang gipaantus...?...Tibuok mong kinabuhi. Nagatoo ka ba nga mahimo kang ayohon ni Cristo ug luwason ka gikan sa nianang balatian; himoon ka nga normal na?

²⁸⁵ Imo bang anak? Ang imong—imong tiil. Nag-inusara ka lang ba nga mianhi? Kung aduna lang ako, kung—kung aduna lang ako'y kusog sa akong kaugalingon, kita mo! Pero nagatoo ako nga tabangan ako sa Dios nga magkaaduna og pagtoo para niini. Pagabuhaton ko ang tanan kutob sa mahimo ko. Nagatoo ka ba kanako? Gitoohan mo ba ang istorya mahitungod niadtong mga squirrel? Gitoohan mo? Nagatoo ka ba nga posible kadto, nga niining buntaga pud, mahimong ayohon sa Dios ang imong lawas, ug makalakaw ka na pag-usab, makalakaw ka nga sama unta niadtong unang higayon? Aduna lang may nahitabo niadtong gipanganak ka, adunay butang nga medyo nagpasanta sa kung unsang butang ug nga wala ka motubo sa husto. Sama sa usa ka bitiis nga mitubo diha sa usa pa ka bitiis, nga nagpabalda hinoon niini. Bueno, kung matangtang kanang bitiis gikan sa nianang bitiis, madiretso gyud ug matul-id kini sa husto. Kita n'yo? Husto ba kana? Usa kini ka tunglo. Usa gyud kini ka tunglo. Kung matangtang ang tunglo, nan mamaayo ka na. Kita mo?

²⁸⁶ Ginoo, naghunahuna ako, unsa kaha kung ako kining anak, unsa kaha kung ako kining igsoon? Pinaagi sa pagtoo, ginatangtang ko kining tunglo, sa Ngalan ni Jesus Cristo. Amen.

²⁸⁷ Ginoo, ginapandongan nako siya sa akong mga kamot ug nangamuyo alang sa iyang pagkaayo, sa Ngalan ni Jesus Cristo. Amen.

²⁸⁸ Amahang Dios, sa Ngalan ni Jesus Cristo, ginapandongan nako sa mga kamot kining nag-antus nga babaye, para sa iyang pagkaayo. Amen.

Igsoong babayeng Nash, giluwasa ka na sa Dios gikan sa kanser, pipila na ka tuig ang milabay.

²⁸⁹ Ginoo, ihatag kang Igsoong Nash ang iyang hangyo. Ingon nga Imong alagad, ginapangamuyo ko kini. Mamahimo kini. Mao na kana ang tubag, Igsoong Nash.

Sa Ngalan ni Jesus Cristo, ihatag sa among igsoon ang iyang hangyo. Amen.

290 [Usa ka igsoong lalaki ug igsoong babaye ang nagapakigsulti kang Igsoong Branham—Ed.] Salamat, igsoon, ug balik ka sa imong mga kabanay nga atua didto. Hinaut nga itugot kini sa Dios. Usa ka maanindot nga panahon kadto, nga nanaghiusa ang mga kabanay mo sa dihang atua ako didto. Atua ka ba sa Bombay sa dihang didto kami? Bueno, kung ingon-ana nagatoo ka sa niining mga butang nga akong . . . nga mga nadungog mo?

291 Ginoos, sa pagpauli niya pabalik sa iyang mga kabanay didto sa gawas-nasud, hinaut nga moadto siya nga puno sa Gahum sa Dios, nga naayo na sa matag hangyo nga iyang gipangamuyo. Hinaut nga molakaw siya ug nadawat kini, sa Ngalan ni Jesus Cristo. Amen.

292 Sa Ngalan ni Jesus Cristo, ang Anak sa Dios, hinaut nga madawat sa among igsoong babaye ang iyang hangyo.

293 Ginoos, itugot ang hangyo sa among igsoong babaye. Hinaut nga ang iyang sakit mohunong na karon mismo, pinaagi sa pagkabanhaw ni Jesus Cristo. Amen. Igsoon, siguradong matuman kini, siguradong mahitabo kini!

294 [Usa ka igsoong babaye ang nagapakigsulti kang Igsoong Branham—Ed.] Gusto mo ba nga mauro kini sa Ebanghelyo? [“Oo.”]

295 Ginoong Dios, samtang nagatindog dinhi ang batan-ong babaye, dili para sa unsa mang hinakog nga mga motibo. Nagaampo ang babaye para sa iyang igsoong lalaki, nga dunay impeksyon sa iyang dugo. ginahatag nako kaniya ang iyang hangyo. Pinaagi sa sugo nga gihatag kanako pinaagi sa Manulonda; ug pinaagi sa usa ka panan-awon mahitungod kang Jesus Cristo, pipila na ka semana ang milabay, sa akong lawak; ginahatag nako niining babaye ang iyahang hangyo. Amen.

296 Mamahitabo kini. Nagapuyo ka ba nga duol dinhi? [Nagaingon ang igsoong babaye, “Memphis, Tennessee.”—Ed.] Memphis, Tennessee. Sulatan mo ako. Nga imong—imong—imo nang nadawat ang imong hangyo.

297 Igsoong Grimsley. [Nagapakigsulti ang igsoong lalaki kang Igsoong Branham—Ed.] Panalanginan ka sa Dios, Igsoong Grimsley.

298 Ginoos, mahinumduman namo kung unsa na ang nadangtan niining igsoong lalaki, ug ang gahong kung asa siya gikuha. Nanguha siya og dugang pa sa Imong Espiritu, Ginoos. Ginahatag nako kini kaniya, sa Ngalan ni Jesus Cristo. Makita ko ang iyang nangaging mga buhat, nga naningkamot siyang magsunod Kanimo, kung ingon-ana, pinaagi sa Gahum sa usa—usa ka sugo nga gihatag sa ako ni Jesus Cristo, nga gipamatud-an sa usa ka Manulonda ug sa usa ka panan-awon, ginahatag nako kang Igsoong Grimsley ang iyang tinguha. Himoa siya nga mapuno sa pagtoo, ug maangkon niya ang usa ka mas haduol Kanimo nga pagkinabuhi.

299 Unsa kaha kung isulti ko sa imo, “Lakaw ug mamaayo na, alang sa Gingharian sa Dios”? Nagatoo ka ba kung unsay gisulti nako mahitungod niadtong mga squirrel ug niadtong uban pa, ug nagatoo ka ba nga kana ang kamatuoran? Kung ingon-ana, Iyang, ginahatag Niya sa ako kung unsay isulti nako niining “bukid.” . . .? . . .Dili ka na magkaaduna pa og usa. Dili ka na magkaaduna pa og usa. Wala na’y mahimong sakit, kamong duha, parehong mamaayo na.

300 Ginahatag nako kining hangyo nga iyahang ginapangamuyo, nganha kaniya, sa Ngalan ni Jesus Cristo. Amen.

301 Amahang Dios, itugot kini, sa among igsoong babaye, ang iyang hangyo, sa Ngalan ni Jesus Cristo. Amen.

Sige, igsoon, lumakaw ka na, toohi kini.

302 Amahan, samtang nagaagi kining babaye, nagaampo ako nga igahatag Mo kaniya ang iyang hangyo, sa Ngalan ni Jesus Cristo. Amen.

303 Sa Ngalan ni Jesus Cristo, ginahatag nako niining babaye ang iyang hangyo. Amen. Ayaw pagduhaduha niini.

304 [Nagapakigsulti ang igsoong babaye kang Igsoong Branham—Ed.] Nagatoo ka ba nga madawat mo kini? [“Oo.”] Kung ingon-ana ginahatag ko sa imo ang imong hangyo, pinaagi sa Gahum nga gikahatag kanako pinaagi sa sugo ni Jesus Cristo, ug nga gisaksihan . . .? . . .Lakaw na, ug—ug ang Dios magauban kanimo.

305 Igsoong Fred, unsay anaa sa imong kasingkasing? [Nagapakigsulti si Igsoong Sothmann kang Igsoong Branham—Ed.] Igsoong Freddie Sothmann, ginahinginlan ko ang hilo nga anaa sa sulod sa imong lawas. Hinaut nga biyaan ka na niini, sa Ngalan ni Jesus Cristo. Amen.

306 Igsoong Collins. [Nagapakigsulti si Igsoong Collins kang Igsoong Branham—Ed.]

307 Ginoo, gitinguha niining bililhong igsoon ang bautismo sa Espiritu Santo. Ginoo, sa tanan nga ania kanako, ginapahayag nako kining Panalangin sa akong Igsoong Collins. Itugot kini. Hinaut nga mokunsad kaniya ang Espiritu Santo, ug hinaut nga mapuno siya sa Espiritu Santo! Amen.

308 Igsoong Collins, siguradong madawat mo gyud Kini, siguradong moabot gyud Kini. Gisulayan lang kita sa Dios.

309 Ginoo, itugot ang iyahang hangyo. Hinaut nga alagaran Ka niya, ug alagaran Ka sa iyang pamilya, sa tibuok nilang kasingkasing.

310 Dios, itugot ngadto sa akong igsoong babaye ang iyahang hangyo. Ang tanan sa iyahang gipangamuyo, madawat unta niya kini, pinaagi ni Jesus Cristo nga among Ginoo. Amen.

³¹¹ Ginoo, ihatag niining igsoong lalaki ang kalig-on aron matabangan ang iyang iglesia. Itugot unta kini. Ginahatag nako sa iya kining kalig-on, pinaagi ni Jesus Cristo. Amen.

³¹² [Nagapakigsulti ang usa ka igsoong babaye kang Igsoong Branham—Ed.] Igsoon, dili maayo nga butang kanang aduna kanimo, pagkanerbiyosa. Nagatoo ka ba nga ang isulti nako kanimo kamatuoran? [“Oo, nagatoo ako.”] Nagatoo ka ba niana karon, nga ang akong—ang akong gisulti sa imo kamatuoran? [“Oo.”] Kung ingon-ana ginahatag nako sa imo ang imong pagkaayo, pinaagi sa Ngalan ni Jesus Cristo. Ingon ka sigurado nga nagatindog ako dinhi sa pulpito, wala na sa imo ang imong pagkanerbiyosa.

³¹³ [Nagapakigsulti ang usa ka igsoong lalaki kang Igsoong Branham—Ed.]...?...Mamatikdan gyud, sa kinatibuk-an mong pagkatawo.

³¹⁴ Ginoong Dios, sa bililhon kong gamay’ng igsoong lalaki dinhi, ang giladmon ug ang kinauyokan sa iyang espiritu nagapanawag susama nga ang kahiladman nagapanawag ngadto sa Kahiladman. Gitunguha niya ang Balaang Espiritu. Ginatahud niya ang Imong buluhaton, Ginoo, sa tanang paagi nga mahimo niya. Pinaagi sa Gahum sa Espiritu Santo, hinaut nga mokunsad Kini sa akong igsoong lalaki, ug mapuno siya sa Gahum sa Dios ug grasya, ang Espiritu Santo. Dawata siya, sa diha nga ginatugyan nako siya sa . . .



LAKAW, ISULTI CEB60-0417M
(Go, Tell)

Kining Mensahe ni Igsoong William Marrion Branham, una giwali sa Ingles niadtong buntag sa Dominggo sa Pasko sa Pagkabanhaw, Abril 17, 1960, didto sa Branham Tabernacle sa Jeffersonville, Indiana, U.S.A., gibalhin gikan sa magnetikong teyp rekording ug gipatik nga walay nakulang sa Ingles. Kining Cebuanong hubad pinatikan na ug gipang-apodapod sa Voice of God Recordings.

CEBUANO

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Pahibalo Bahin Sa Katungod Sa Pagmantala

Ang tanang katungod sa pagmantala iyaha lamang sa tag-iya. Kining basahona mahimong i-print sa printer sa balay alang sa personal nga gamit o sa pagpang-apod-apod, nga walay-bayad, ingon nga usa ka instrumento sa pagpakaylap sa Ebanghelyo ni Jesus Cristo. Kining basahona dili mahimong ibaligya, kopyahon nga pang-dinaghan, i-post sa website, i-store sa usa ka retrieval system, ihubad sa ubang pinulongan, o gamiton sa pagpangayo og mga amot nga walay ginapagawas nga kasulatan nga pagpahanugot gikan sa Voice Of God Recordings®.

Alang sa dugang nga mga kasayuran o alang sa uban pa nga ginapang-apod-apod nga mga materyales, mahimong kontakon ang:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org